

L'Agricoltura corsa 2010-2030¹



¹ Aduttatu u 24 di settembre di u 2013

SUNTA

Introitu.....	5
Panurama di l'agricultura isulana	7
I- A CUSTITUZIONE DI UN PRICOGHJU.....	12
I.1. A FURMAZIONE AGRICOLA	12
a) <i>U stabulimentu publicu di u Borgu</i>	14
b) <i>U stabulimentu publicu di Sartè</i>	15
c) <i>U centru di prumuzione suciale di Corti</i>	17
I.2. A SCELTA DI L'AGRICOLTURA	21
I.3. A STALLAZIONE	22
I.4. L'ESERCIZIU DI U TRAVAGLIU AGRICULU.....	25
I.5. U TRAMANDÀ DI U MISTIERU È L'APPRUNTÀ DI A RITIRATA	26
I.6. L'INDIBITÀ AGRICULU	28
II- E FILERE	30
II.1. E FILERE ANIMALE	
a) <i>Filera vaccina</i>	31
b) <i>Filera purcina</i>	32
c) <i>Filera pecurina</i>	32
d) <i>Filera capruna</i>	33
e) <i>Filera apicula</i>	34
II.2. E FILERE VEGETALE	
a) <i>Viticultura</i>	36
b) <i>Agrumi è frutti à chjoppula</i>	38
c) <i>Frutti di statine (presche, nettarine)</i>	40
d) <i>Urtaglia</i>	41
e) <i>Chivicultura</i>	42
f) <i>Oleicultura</i>	43
g) <i>Castaneicultura</i>	43
h) <i>Acquacultura</i>	44
i) <i>A filera di e piante aromatiche è medicinale</i>	44

II. 3. A filera biologica	46
II.4 A FILERA LEGNU	47
III- E PRUBLEMATICHE TRASVERSALE	49
III.1 U FUNDIARIU AGRICULU	49
a) A SAFER (Sucetà d'Assestu di u Fundiariu è di Stabulimentu Rurale).....	52
b) U cunservatoriu di u spaziu litturale è di liti lacustri	56
c) L'EPF (stabulimentu publicu fundiariu).....	57
d) L' AFP (Associu Fundiariu Pasturecciu).....	57
e) I Cunsigli Generali	57
III.2 L'ACCESSU À U FINANZÀ.....	59
III.3 A PRODUZIONE	63
III.4 U CUMMERCIALIZÀ	64
III.5 I SALARIATI AGRICULI	65
IV- L'AIUTI È U FINANZÀ PER L'AGRICOLTURA	67
IV.1 I SOCI ISTITUZIUNALI	
a) L'unione europea	67
b) I servizi di u Statu	68
c) L'ODARC.....	69
d) L'OEC	70
e) E Camare d'Agricoltura Dipartimentale è Regiunale	72
IV.2 L'AIUTI À PRÒ DI U MONDU AGRICULU	
a) E prime secondu a produzzione à ogni agricoltore	72
b) E prime secondu u prughjettu di l'agricoltore	73
c) L'aiuti à e filere	73
V- CHJUSURA	76
Listinu di e persone ascolte	77
Listinu di e sigle	79
Ringraziamenti	81

Stu travagliu, realizatu dopu à u ricorsu stessu di u CESC, hè statu purtatu da a cumissione ad hoc agricultura, custituuta à posta.

Sta cumissione, diretta da u Sgiò **GAFFORY** Pierre-Toussaint era cumposta di :

CICCADA Vincent, **FERRANDIS** Christophe, **FRANCESCHI** Henri, **GRAZIANI** Jean Claude **LUNARDI** Louis, **MAUPERTUIS** Roger, **ORSONI** Michel, **PERRIN** Claude, **PIANELLI** Jean Dominique, **SALVATORINI** Patrick, **SICURANI** François Marie.

U gruppu di travagliu hè statu aiutatu in i so travagli da u Sgiò Xavier PETTINATO à nome di i ghjovani agricoltori di a Corsica Suttana.

S'è l'agricultura hè una attività essenziale à l'economia regionale da a so cuntribuzione à l'impiecu è l'asestu di u territoriu corsu, dipende da un cuntestu largu di più chè quellu di l'isula.

In i fatti, evolueghja in un mercatu europeu unicu cumpostu di 27 Stati membri è in un sistemu mundializatu chì fermanu da rifarenza.

À l'orizzonte 2050, a pupulazione mondiale hà da cuntà 9 miliardi esseri, a nostra produzione agricola duverà dunque cresce di un 70% da suddisfà l'inseme di i bisogni alimentari, à a scala di a pianeta.

A tematica ecologica affianchendu à quella di l'agricultura, bisogna à ùn scurdà si di quellu fenomenu chjucutu di u riscaldà climaticu.

Crucivia di u Mare Terraniu è di l'Europa di u Sudu, a nostra isula cumincia à risente l'effetti di quellu riscaldà è i so impatti cunsequenti à livellu di u nostru ambiente, tantu à livellu di a pluviometria chè à livellu di a temperatura (allunghera di a staghjunalità) o di e mute di a vegetazione è di i so effetti sanitari.

Prutegge u nostru ambiente ferà parte di a scumessa agricola di dumane, per ciò bisognu à analizà sta problematica, di pettu à una istituzione europea, chì ognitantu vestuta di a virtù di l'intenzione, risente paure à integrà ste mutazione climatiche, chì à termine puderanu mudificà u nostru mudellu agriculu.

In un cuntestu forte di mundializzazione, hè ragiò chì stu mudellu agriculu nostru vulessi firmà u mudellu spechju, u rispechju di una terra, à l'accorta una sucetà agricola chì prumove una agricultura identitaria, arradicata forte in u so patrimoniu, a so essezza stessa.

Nimu pò nicà chì, à ghjorni d'oghje, noi chì simu cunsumatori ùn siamu sempri di più cuncernati da l'origine di i prudutti cunsumati, priferendu di modu chjaru i prudutti di u locu, soli à garantì a qualità è u seguità. Sta qualità vene da un sapè fà anticu, amparatu in e nostre zone paisane, ste zone rurale indù l'agricultura ferma u veru vettore di una dinamica suciuicunomica, attu à ritene a pupulazione è una ghjuventù à vene.

Eppuru, chì seria a nostra agricultura senza l'agricultori? S'hè scrittu assai, discutitu è riflettu nant'à u rollu di l'agricultore, è à spessu omu s'hè scurdatu di piazzà a persona in core di quellu prugettu. Chì serianu i nostri paisaghji, a nostra machja senza l'azzione di l'animali ?

Chì serianu e nostre filere senza quell'omi è donne chì, ogni ghjornu, danu u so tempu da toglie da a terra quelli prudutti chì ellu ci invidia u mondu ?

L'agricultura nostra hè à un crucivia maiore di u so sviluppu, l'incertezze di u passatu anu cuntribuitu à u so sottusviluppu, hè ora avà di prupone pulitiche strutturante da incuragì ghjovani à l'acatizzà di quella fiacula. St'attività essendu oghje una vucazione, una vulintà di tramandà un sapè fà, un patrimoni identitariu corsu forte, una tradizione, in fatti una pulitica di civilizzazione propia à e nostre risorse isulane.

Da riesce un ritimu di sviluppu armuniosu di u nostru arnese di travagliu, bisognu à analizà u percorsu di l'agricultore in u filu di a so vita sana, po di studià i vari prublemi scontri chì serianu di natura à frenà a sparghjera di a nostra agricultura è in fine, di mette l'agricultura corsa in pusizione di puntellu oblicu di a Pulitica Agricula Cumuna per u 2014.

Di sicuru veneranu e soluzione da u cullettivu. Per ciò stu travagliu hè statu occasione di parechje audizione, emu ascultatu, intesu l'inseme di l'attori di u mondu agriculu, l'istituziunali, i prufessiunali, i sindacati, e filere, l'attori educativi, a nostra linea direttrice essendu u dimustrà, per via di stu documentu, ch'ella hà a so piazza ogni riflessione o cuntribuzione.

Vole stu documentu, di modu umile, unisce l'attori in giru à pruposte forte da definisce una reta di soluzione chì permetterà à a nostra agricultura d'ùn esse intrappulata.

Di sicuru, numarosi sò i prublemi, l'isula pate d'una geugrafia particolare assai, di una pupulazione invecchjata, di un desimpegnu bancariu certu, di una assenza di maestria fundiaria, di un sfruttà deficiente di i valori aghjunti è puru, a nostra agricultura hè presente è bè in i nostri territorii.

Facenu ste produzione a rinomina è a ricchezza di i nostri lochi, a nostra agricultura hè trascorrente, tocca duminii varii, tale u fundiariu, l'ecunomia, i trasporti, l'ambiu, u sviluppu ammansatu, u turisimu, à l'accorta, sò cuncernati tutti i campi d'attività di a sucetà, hè custitutiva di un zocculu di perennità è d'evuluà di a nostra sucetà.

Puru, prima d'attaccà in u fondu e prublematiche è forse e suluzione chì ci sò poste, ci pare una necessità tremenda di fa un studiu sanu di l'agricultura isulana, postu chì quellu ritratu ferà da zocculu, basa di a nostra urientazione di travagliu.

PANURAMA DI L'AGRICOLTURA ISULANA

Tene l'agricultura corsa una piazza ridotta in l'ecunomia isulana incù un 2% di u PIB è 3,6% di a pupulazione attiva.

Dapoi 10 anni, hè caratterizzata da un rinculu. Eppure, hè limitatu chì, aparacunatu à e statistiche naziunale, pare chì l'agricultura corsa resisti megliu chè in altrò.

Di fattu, a calata di u contu totale di i pricoghji (-21%) hè inferiore à a calata naziunale (-26%)². Sta resistenza vene frà altru di u fattu chì, ben chì ridottu à livellu di u spaziu, u nostru mudellu agriculu appia sapiutu avvià si verdi i segni di a qualità, elementi di basa di u sviluppu.

Per a pupulazione agricola attiva, l'isula conta 2973 splutadori agriculi nant'à u rughjone Corsica, à mezu à quale 914 impiecanu manu d'opera (splutadore agriculi, furestieri, salariati di cuoperative, urganisimi agriculi).

A scumpartera di i salariati agriculi, zocculu di e splutazione si face cusì :

- I salariati settore produzione (Pricoghji) ⇒ 45%
- I salariati d'impresu di travagli o furestieri ⇒ 10%
- I salariati d'attività d'accantera cundiziunamentu (frutti è ligumi, cuoperative) ⇒ 6%
- I salariati di l'urrganizazione Professionale Agricole (ADMR, MSA, Credit Agricole, Groupama, Camare d'Agricoltura ...) ⇒ 39%

D'altronde, à mezu à una curpurazione indù stereotipi sò numerosi assai, hè certa ch'ella hè in andatu una feminizzazione impurtante. E donne "capu di splutazione agricole" sò 564, sia un 17% di i non salariati agriculi.

U mistieru d'agricultore, da a so difficoltà, sbucina parechji statuti chì sò tanti vantaghji da perennizà, rende campatoghji è sviluppà i pricoghji. Hè cusì chì l'aiuti famigliari (zitelli travagliendu incù i genitori) sò 110.

U statutu d'aiutu famigliare hè cambiatu da esse cunfinatu à 5 anni. L'ughjettivu essendu di puntà à una ripresa di a splutazione o una stallazione.

² Dati AGRESTE di nuvembre di u 2011 chì currispondenu à u censu agriculu per l'annu 2010

Cusì, i sposi cullaburadori di i splutadori agriculi sò 246. Apprufittanu di un statutu megliuratu chì li permette d'avè diritti superiori à quelli di simplici sposi, à sapè una ritirata megliurata è una garanzia in casu d'accidente di u travagliu.

Puru a pupulazione agricula isulana hè tocca da un invecchià chjaru sapendu chì l'età media di i splutadori hè di 49 anni.

D'altronde, si rimarca chì in e "splutazione mezane" è "maiò", un 72% di i capisplutadori o cosplutadori facenu parte di u stratu d'anni di i 40-65 è i più di 65 ripresentanu un 9%.

Omu po' nutà dinù chì un 70% di l'effettivi di u stratu d'anni di i 60 anni sò arburicultori è viticultori. Traducenu sti sciffri un invecchià di a pupulazioni malgratu una filera dinamica.

Da fà un censu u più ughjettivu pussibile di a nostra agricoltura, bisognu à usservà e varie caratteristiche chì cumponenu e splutazione.

Hè cusì chì, trà u 1970 è u 2010, in l'isula, un 66% di e splutazione sò state perse. In un deceniu, a Corsica hà persu 768 splutazione agricole. Sta perdita hè marcata di più in a categoria di e "piccule splutazione" (-31%), invece a categoria custituita da "e splutazione mezane" hà resistutu u megliu incù una sminuita di un 9%. In parallelu, e "splutazione maiò" cunnoscenu una calata di un 19%.

A sminuita di u contu di i pricoghji ùn tocca u settore di l'allevu (fora i pecurini). A filera vaccina increce di un 29%. Invece, sminuisce u contu di e splutazione incù una orientazione vegetale.

Pussede oghje a Corsica 2810 splutazione minore incù a particolarità d'una produzione diversificata è caratterizzata assai. Sta caratterizzazione si sprime à puntu da produzione identitarie incù un altu valore aghjuntu.

Oghje l'agricoltura corsa hè cuncintrata nant'à trè tippi di zone :

- Zona di piaghja
- Zona di media muntagna
- Zona d'alta muntagna.

In zona di piaghja, sò e splutazione girate di più versu e produzione vegetale, l'arbureti, l'agrumi, l'urtaglia, a vigna, l'allevu pecurinu è vaccinu.

In zona di montagna, si vede una agricoltura caratterizzata da una avvia tradizionale di più basata nant' à un allevu estensivu, u castagnetu è l'allevu purcinu, caprunu, vaccinu.

In Corsica Suprana, l'agricoltura ripresenta un 90% di i vigneti, quasi un 100% di l'agrumi, di l'urtaglia è di i frutti di statina.

In quantu à l'agricoltura di Corsica Suttana hè girata di più versu l'allevu è a produzione.

À mezu à sti pricoghji, 1550 sò classificati in a categoria di e "splutazione mezane" chì u so PBS³ hè stimatu à 25000 €.

In più, si conta splutazione familiare chì, à u cuntrariu di ciò chì si ritrova in Francia cuntinentale, currispondenu di più à una agricoltura d'impresa incù sucetà agricole maiò.

E varie statistiche ci mostrenu chì a Superficie Agricola Utile (SAU) media hè cresciuta st'ultimi deci anni (+37%) da ghjunghje sin' à 60 ettari ma sta tendenza devi esse muderata da a presa in contu di e superficie di landa è i percorsi dichjarati incù raghjò.

In termine di superficie, 140000 ettari sò aduprati oghje.

20000 ettari di superficie sò culture estensive è pirene, i 120000 ettari chì fermanu sò percorsi per e vaccine, i capruni è i pecurini.

E superficie sò scumpartute in classa è categoria economica di modu seguente :

- 20 % di u contu totale di i pricoghji currispondenu à a classa di e superficie "inferiore à 5 ettari". Sta classa hè custituita in maiò parte da a categoria economica "piccole splutazione" (78%).
- 21 % du u contu totale di i pricoghji currispondenu à a classa di e superficie "più di 100 ettari". Sta classa hè in a maiò parte custituita da a categoria economica "splutazione mezane" (72%).

³ PBS : E superficie agricole è u bistame sò valorizati secondu cuefficienti chì pirtettenu u calculu di u PBS. Sti cuefficienti venenu da i valori medii calculati per u periodu di u 2005 à u 2009. U PBS descrive un putenziale di produzione di e splutazione è permette a classifica di e splutazione secondu u so pesu economicu in "piccole, mezane è maiò splutazione". E piccule anu un PBS inferiore à 25000€, e maiò un PBS superiore o uguale à 100000€ (fonte AGRESTE, Ministeru di l'Agricoltura, di l'alimentazione, di a pesca, di a ruralità è di l'asestu di u territoriu).

Un quartu di l'effettivi di a categoria economica "splutazione maiò" si trova in a classa di e superficie di i "20 à 50 ettari".

Eppuru, fattu à a lestra st'inventariu, bisognu à interruga si nant'à e prublematiche apparente chì stu custatu face risorge, à sapè chì e zone di l'internu ùn sò sfruttate abbastanza, una sottusplutazione chì inghjenna resultati ecunomici piuttosto debbuli.

Bisogna tandu à prupone vie è mezi da avversà stu fenomenu quantu in termine di fundiaru chè in termine d'elighjibilità di e superficie o d'aiuti specifichi à i territori aduprati u più ma capace à sviluppà un mudellu agriculu cuerente è compatoghju.

Altresi, s'ellu pare impurtante u travagliu fattu da l'agricultori da strutturà e so splutazione, a tematica disottu a più chjara ferma a debbulezza di e rendite di a massa salariale. Unu frà i mezi chì pirmetteria di contrabilancià à modu sicuru sta debbulezza di e rendite seria a creazione di una produzione chjara, labellizata, identificata, capace à fà sbuccà un valore aghjuntu è à permette à u sfruttadore d'uttene una rendita curretta.

À cuntrariu di i detti di i partigiani di l'ufferta meglià è di u costu minimu, tene valore a qualità, un valore chì spechja una amparera, un metudu di travagliu, una cultura è per ciò hà cunsequenze nant'à a tarifficazione.

Hè cusì chì pruce à costi ghjusti incù un valore aghjuntu necessariu è dinò palesu duverà permette di sgagià pussibilità di mania è dunque rendite di più in cunformità incù u travagliu fattu. Unu mezu pertinenti liatu à u sviluppu di u valore aghjuntu stà in u sviluppu di i circuiti di u cummercializà corti chì anu da fà tremenda opera di "campabilità".

À ghjorni d'oghje, pare di primura di sbarazzà si di i stereotipi, u mistieru d'agricultore abbisogna rispettu è valorizà. I nostri ghjovani u sceglienu per vucazione è micca per raghjò, in Corsica, u fenomenu identitariu hè un trattu forte forte.

U numeru di ghjovani, arradicati à u paese, in brama di sviluppà u so locu per via di una attività agricola, hè impurtante assai.

Sta ghjuventù corsa ambiziuneghja, da l'attività agricola, di cuntribuisce, grazia à produzione labellizate, liate à un territoriu incù una relazione di vicinanza incù i cittadini cunsumadori, à fà evulà à u livellu suciale è economicu a so microrughjone.

Di sicuru hè passiuante stu mistieru, dumanda monda sacrifici ma a fiertà di pudè mustrà e so produzione in u mondu sanu, danu sintimi chì quelli sforzi sò cumpagni di l'esse.

Studiendu l'andatu chì face un pricoghju à u longu d'una vita, ghjustu à puntu custruimu e base di una riflessione nant'à quellu esse.

I- A CUSTITUZIONE DI UN PRICOGHJU À U LONGU DI UNA VITA

A nostra vuluntà d'avvicinà stu primu passu di u nostru studiu da u puntu di vista di a persona ci pare primurosamente assai da ch'ellu piazzu l'umanu in core di u prughjettu suciale agriculu.

Per ciò a prima parte di stu studiu hà da tucà u principiu di a vita agricula da ghjunghje in fine à a ritirata, da suvità u caminà di una vita da a furmazione sin'à a ritirata.

I.1. A FURMAZIONE AGRICOLA

Si definisce a furmazione cum'è u zocculu di u principiu di a vita agricula. Hè l'elemente chì permetterà l'urientà di u ghjovanu, è dunque di trasmette li i sapè fa di a nostra isula, u metudu di travagliu, l'amparera di u mistieru d'agricultore.

Eppuru a furmazione permette l'affaccata d'impurtante scumesse, tale l'avviera di u ghjovanu in u so parcorsu per una stallazione in u so prughjettu di vita da agricultore. Per ciò u duvere di a furmazione serà di fà risente a realtà spaziale è ecunomica di l'isula.

Secondu parechji attori sianu sucioecunomici o agriculi, u ghjovanu deve esse avviatu versu una splutazione di scala umana, in cunfurmità cù a realtà di u nostru territoriu da permette li di sviluppà parechji ipotesi da andà verd'una poliattività.

In lingua cumuna, l'oghjettivu hè d'incurasgì u ghjovanu à avvià si versu una splutazione di superficia chjuca, incù speculazione duale è diversificate, capace à prудuce prudutti cù un valore aghjuntu forte. Ma prima di ghjunghje ni à quellu valore aghjuntu è a qualità chì l'accompagna, hè certa ch'ellu ci vole di modu oblicu mantene è trasmette i sapè fa. A scumessa sana sana di furmazione tene in quella sfida tremenda, tramandà una tradizione, un arte, una cultura, una manera di trasmette un sapè fa è un metudu di travagliu, lascita di i tempi landani, chì face fede è ingagia l'avvene di e generazione nove, chì à stà li à sente, parechji ghjovani contanu praticà à l'usu anticu, hè ghjustu à puntu hè quellu usu chì ci vole à sviluppà. U valore aghjuntu vene anzituttu da quelli usi cusì particolari.

A furmazione agricula, hè dinù una manata d'ufferte chì deve avvicinà si à u più di e brame è l'urientazione di i ghjovani chì si volenu piglià quellu andatu.

D'altronde u mudellu d'organizzazione hè quellu seguente :

L'offerta globale di furmazione di i ghjovani hè assicurata da i LEGTA (licei d'insignamentu generali è tecnologicu agriculu) è i Centri di Furmazione d'Amparera Agricola (CFAA) per a furmazione iniziale sculara è a furmazione iniziale d'amparera indù u tempu passatu in impresa hè impurtante di più.

U sistemu di l'amparera permette d'avè un pede in l'agricultura di più in furia, d'impettà si à a realtà di u terrenu è di francà si di un pussibile abandonu di sta furmazione. L'inseme di u valore di quella furmazione tene in a so realtà di pettu à u terrenu, permette un cuscentizà di u travagliu da pruvede.

A furmazione assicurata da i Centri di Furmazione Prufessiunale è di Prumuzione Agricola (CFPPA), hè dedicata à l'adulti scritti in una dimarchja di ricunversione prufessiunale (ripresa di un pricoghju o una altra funzione dentru à l'impresa) da ottene un Brevettu PRufessiunale Capimpresa Agricola (BPREA).

In ste furmazione, si pò nutà un inghjuvanì di u publicu cù una età media di 20-25 anni è per a maiò parte si tratta di una ricunversione prufessiunale.

U basigliè prufesiunale è u BPREA sò i dui diplomi di livellu IV chì aprenu a via à una stallazione è l'accessu à l'aiuti à una stallazione tale a Dutazione Ghjovanu Agricultore (DJA), u bunificà di certi impresti, l'aiuti liati à a produzione agricola, è dinù u benefiziu di a crescita di l'aiuti à l'investimentu.

U basigliè prufessiunale hè un livellu scularu altu incù insegnamentu di materie generale (francese, matematiche, storia, geugrafia, fisica è biulugia) è di materie propie à l'agricultura (agrunumia, allevu, gestione è cuntabilità) chì permette un perseguì di i studii.

U BPREA permette un apparinà di certi dati sculari è privede una amparera di nuzione in leia incù l'agricultura mischjendu insegnamentu praticu è teoricu.

Nant' à u territoriu isulanu, i stabulimenti incaricati da a furmazione agricola sò :

a) U stabulimentu publicu di u Borgu

U Liceu di Stabulimentu Generale Tecnologicu Agriculu ch'ì forma à i diplomi seguenti :

U basigliè professionale incù e specificità seguente :

- Assestu di u paisaghju;
- Cunducimentu è gestione di e splutazione agricole / sistemu allevu per u più ;
- Servizi à i personi è i territorii ;

U basigliè Tecnologicu Scienze è Tecnologie di l'Agrunomia è di u Vivu.

A seconda professionale spezzata in e tematiche seguente :

- -Ozzione Natura giardinu paisaghju foresta (travagli forestieri- travagli d'assesti di u paisaghju) ;
- Ozzione Produzione animale (sistemi d'allevu) ;
- Ozzione Servizi à e persone è à i territorii.

U Centru di Furmazione d'Amparera Agricola (CFAA) ch'ì prepara à i diplomi seguenti :

- U Brivettu Professionale di Capimpresa Agricola ;
- U Certificatu di Capacità Professionale Agricola :
 - -Ozzione intrattenimentu di u spaziu rurale
 - -Ozzione Produzione agricola, usu di i materiali/produzione animale
 - -Ozzione Produzione Urticule/Piantinaghja
 - -Ozzione Servizi in ambu rurale
 - -Ozzione Curatore di l'equidi
 - -Ozzione Travagli nant' à u paisaghju

U Centru di Furmazione Professionale è di Prumuzione Agricola (CFPPA) ch'ì prepara à i diplomi seguenti :

- U Brivettu Professionale Capimpresa Agricola.
- U certificatu di Capacità Professionale Agricola (CAPA) :
 - I Servizi in ambu rurale ;
 - I travagli nant' à u Paisaghju.

Si pò usservà chì, u situ di u Borgu sviluppa una ufferta di furmazione, chì tocca à tempu à l'allevu è e produzione vegetale.

b) U Stabulimentu Publicu di Sartè

U Liceu d'Insignamentu Generale Tecnologicu Agriculu forma à i diplomi seguenti :

Bascigliè prufessiunali tale :

- Cunducimentu è gestione di l'impresa cavallina;
- Gestione di l'ambii naturali è a fauna;
- Furesta.

Brivetti di Tecnicu Superiore Agriculu :

- Analisa è cunducimentu di sistemi di sfuttera;
- Gestione è prutezzione di a natura;
- Gestione furestiera.

Biqualfiche :

- Accumpagnadore muntagna media;
- Brivettu naziunale di sicurezza è salvamentu aquaticu;
- Nutadore salvatore;
- Uperatore di parcu acrobaticu in altura.

U Centru di Furmazione di l'Amparera Agricoltura (CFAA) forma à :

- u Brivettu Prufessiunale di Capimpresa Agricola;
- u Bascigliè Prufessiunale Tecnicu Vendita Alimentazione, ozzione prudutti alimentari;
- u cunducimentu è a Gestione di Splutazione Agricole, ozzione sistemu allevu per u più.

U certificatu di capacità sbucina parechje tematiche tale a produzione agricola, l'usu di i materiali, e produzione urticole, a qualifica di curatore d'equidi, i travagli furestieri, i servizi in l'ambiu rurale, l'intrattenimentu di u spaziu rurale è i travagli nant'à u paisaghju dinù.

U Centru di Furmazione Prufessiunale è di Prumuzione Agricola (CFPPA) di Sartè forma dinù à u Brivettu Prufessiunale di Capimpresa Agricola (BPREA) è à quello di rispunsevule di cantieri furestieri.

D'altronde, specializzazione si sbucinanu cusì: specializzazione d'iniziativa locale trasformazione è cummerciu di prudutti casani ma dinù una prequalifica à i mistieri di l'agricultura è a foresta. In suprapìu stu stabulimentu hà messu in andatu specializzazione liate à u turisimu verde, à l'accolta è l'animazione in ambu rurale è dinù u putà è u curà di l'arburu.

U Brivettu di Tecnicu Superiore Agriculu prupone trè pussibilità incù l'analisi è u cunducimentu di sistemu di sfruttera, a gestione è a prutezzione di a natura è dinù a gestione forestiera.

Omu po' dinù nutà chì i Stabulimenti Pubblichu di u Borgu è di Sartè anu da gestisce in u so propiu senu una splutazione agricola ciò chì permette à i ghjovani in furmazione d'esse subito cunfronti à a realtà di u terrenu.

À principiu i stabulimenti publichi lucali agriculi prupunianu furmazione in leia cù i so territorii. Cusì u liceu agriculu di Sartè era di più giratu versu e furmazione di l'allevu pecurinu, purcinu è a produzione, invece chì u liceu agriculu di u Borgu era specializatu di più in e filere vegetale. Puru ùn essendu sempre effettiva a mubilità, ci hè vulsutu à adattà l'ufferte di furmazione à e dumande.

Cusì, malgratu una larga scelta in e furmazione, unipoche specializzazione tecniche cunnoscenu effettivi debuli assai.

Ancu s'ella pare difficiule d'identificà i bisogni di modu precisu, i stabulimenti publichi lucali agriculi di furmazione tenenu à prupone furmazione chì currispondenu di modu strettu strettu à l'attese è i bisogni di u mondu agriculu è chì piglianu in contu l'evuluzione di u mistieru d'agricultore.

Dapoi unipochi d'anni, u numaru di lavurante in a furmazione agricola hè cresciutu chì u diplomu di stallazione hè apertu tantu à a furmazione adulta chè à a furmazione per amparera. U fattu di pudè entre in furmazione di gratisi, hà arrecatu un publicu chì pudia esse indecisu, in particolare in quantu à l'investimentu persunale è dinù finanziariu.

In quantu à l'età di furmazione di l'adulti, si po' fà u custatu di un publicu inghjuvanitu incù una età media di 20-25 anni è per una parte maiò di i ghjovani adulti si tratta di una ricunversione professionale.

Durante l'ultimi trè anni, s'hè vista una crescita di a dumanda da figlioli d'agricultori o ghjovani chì volenu ripiglià u pricoghju familiare, ma dinù da ghjovani chì preferiscenu avvià si ver'di u mistieru d'operaghju agriculu.

I stabulimenti sculari agriculi sviluppanu a so cummunicazione à prò di l'elevi di i culleghji è licei à tempu nant'à e furmazione pruposte è e pussibilità d'impiecu per via di fori, cunfarenze o reunione d'infurmazione indù sò invitati agricultori.

L'ughjettivu essendu di purtà à l'elevi u schjarià di a professione nan'à u mistieru d'agricultore, di realizà ciò ch'elle sò e difficoltà di u mondu agriculu, ma dinù di mustrà i successi da pruvucà vucazione.

c) U Centru di Prumuzione Suciale di Corti

U CPS di Corti, u più anzianu centru di furmazione di Corsica, hè statu creatu in u 1969 da risponde à e necessità di l'epica ma dinù da riinvestisce u spaziu rurale à principiu per via di l'artisgianatu d'arte è a produzione.

L'attività in un ambu rurale essendu liata à a stretta à l'agricultura, u CPS s'hè avviatu in un secondu tempu versu l'agricultura, à sapè l'agricultura tradiziunale (allevu caprunu, vaccinu, purcinu) cù a creazione di u Certificatu di Capacità à e tecniche d'agriculture di Muntagna (CATAM), unicu in Francia è valutatu à u livellu naziunale, u scopu era di valorizà i sapè fà lucali. Stu diplomu s'hè trasformatu in u tempu da divintà u BPREA.

Aldilà di e furmazione classiche chì aprenu a via à a stallazione, u CPS di Corti s'hè scrittu in una dimarchja di svariatazza di l'offerta di furmazione da piglià in contu i bisogni ecunomici agriculi di u mondu campagnolu.

Cusì, furmazione corte di più (da 300 à 600 ore) sò pruposte nant'à u turisimu rurale, l'osteria campagnola, l'eculugia/ambu, i mistieri di a petra, e piante aromatiche medicinale, a gestione di l'acqua. Una furmazione di guida accumpagnadore muntagna hè dinù pruposta da affiancà l'attività agricula è favurizà a pluriattività.

Ste strutture danu insegnamenti chì coprenu l'inseme di u duminiu agriculu è offrenu una diversità in e scelte da avvicinà megliu a so propria speculazione è purtà un sapè tecnicu à a splutazione.

Dopu à st'inventariu di l'offerta di furmazione, bisognu à studià e varie problematiche chì si ponenu à a furmazione agricula è e varie soluzione ch'ellu ci vole à prupone.

Pare ch'è s'ella hè oghje indebulita a furmazione hè per via di l'incertezza in quantu à l'offerte di furmazione ch'è dipendenu purtuttu di u numeru di partecipanti è dunque di fatti indebuliscenu a gestione di e squadre pedagogiche.

In suprapù, i professionali di u mondu agroeducativu anu à spessu custatatu ch'è u livellu di qualifica di i ghjovani ch'è si stallanu currisponde solu à a furmazione di basa. Hè indispensabile u BPREA ma ùn basta in particolare per ciò ch'è di i sapè fà.

L'ughjettivu d'ogni offerta di furmazione deve esse d'alzà u livellu di u ghjovanu è di dà li a manata d'arnesi indispensabile à u so realizà.

S'hè usservatu in particolare ch'è u settore di l'allevu hè da accumpagnà da tecnici di e Camere o altri urganisimi da pudè sviluppà tecniche da megliurà a pruduttività.

A furmazione per l'adulti arrehjstregghja un percentuale di successu à u BPREA circa i 85% ma un percentuale di stallazione di 57%. Una di e caghjone di u percentuale bassu di e stallazione ferma a mancanza di fundariu.

Posti sti prublemi, a nostra riflessione hà per scopu d'apre vie è mezi da permette infine di purtà soluzione ch'è si scriveranu in u tempu.

Pare cusì necessariu di definisce una pulitica agricula regiunale da mette in sinergia l'inseme di i mezi à prò di a professione agricula è dà più cuerenza à l'azione purtate da l'ODARC, e camere d'agricultura è e filere.

Ùn si pò solu cuncepì a furmazione cum'è un mumentu d'amparera, hè un arnese à prò di l'agricultore in a so vita cutidiana, hè un elementu di u cuntinuu di a so vita.

Hè per quessa ch'è l'inseme di l'attori di u mondu agriculu si deve ritruvà in giru à una gestione cuntabile specifica di i posti è mezi messi à prò di e strutture agricole, da prumove una furmazione di qualità favurizendu u valore più chè a quantità è ghjè stu valore ghjustu à puntu ch'è à pocu à pocu ferà a quantità. Più serà qualificante à un livellu altu una furmazione è più anderà versu a specificità più serà attrativa. Ognunu a sà ch'è s'è furmazione di qualità ch'è facenu l'agricultura di qualità.

E splutazione agricole di i stabulimenti, una eccessione francesa, devenu firmà arnesi pedagogichi ch'è si scrivenu in una dimarchja di professionalizazione, d'innuvazione è di sperimentà.

Una dutazione regiunale puderia permette di supportà i costi di funziunà di ste strutture è di megliurà a tecnicità da tucà l'eccellenza.

L'ambizione serà dinù di torce u collu à parullacce tale a qualità, l'eccellenza chì ognitantu sò scherzate.

Bisognu à esse fieru di prудuce qualità. Prufessionali, attori di u mondu agriculu anu u dirittu d'aspettà è di chere furmazione chì ùn sianu à minimu ma à massimu da avvicinà una tecnica sana sana chì garantisce un sapè fà unicu.

Ogni persona, chì hà laziu à investe si in stu mezu, deve vede è percepì l'attrattività di e furmazione agricole in particolare grazia à a furmazione da luntanu, i stazi in e splutazione è i viaghji di studiu chì, in ciò chì tocca à l'amparera, sò tanti vivaghji.

Pare necessariu dinù d'alzà u livellu di furmazione superiore à u solu BPREA è di dinamizà i percorsi di furmazione da acquistà e qualifiche necessarie à u travagliu agriculu. È dinù, in u penseru d'un armunizà, seria una bona d'interrugà l'animatore di i gruppi urganizati da fà currisponde l'offerte è e dumande di furmazione da unisce u più pussibile mondu in giru à l'amparera.

Ùn seria cumpletta st'analisa senza sottulineà a tremenda necessità par a Cullettività Territoriale d'impegnà si di più à u livellu finanziariu ma dinù in i modi di messa in opera di i chjamaservizi anninchi ch'ella face. St'annualità, chì hà per scopu di risponde à un bisognu puntuale, indebbulisce a strategia di l'inseme di l'urganisimi di furmazione, rinfurzendu d'altronde a precarità di e squadre di furmatori.

A nostra analisa mette in rilievu chì i chjamaservizi pluriannuali indittati serianu capiscitoghji di più è permetterianu un custru di a pulitica di furmazione. A ci francherianu di a strategia di u spargulime è u spezzà chì prova à risponde à un bisognu puntuale senza definisce una strategia di l'inseme.

Bisognu à incalcà dinù chì i capisplutazione chì travaglianu in i licei agricoli, malgratu a so missione di serviziu publicu, sò amministrati da un statutu di dirittu privatu. Seria una bona ch'elli possinu benefizià di stessu statutu di funziunari ch'è u persunale insegnante di l'insegnamentu publicu agriculu, permetteria un ghjustu sbilancià suciale.

Nimu pò nicà oghje u rollu fundivu ghjucatu da a furmazione in u capì di u mistieru d'agricultore. Simu quantunqua dilusi assai di custatà u scartu ch'ellu ci hè trà u contu di i candidati chì portanu un prughjettu in agricoltura è chì bramanu à veru di stallà si è u contu di e realizzazione effettive. Si valuta u contu di e stallazione effettive à una cinquantina à l'annu.

Pare utile di nutà quantunque chì u contu di i ghjovani scritti in BPREA hè u doppiu riguardu à quelli chì si stallenu. Cusì chì, u liceu agriculu di Sartè dispone di 15 piazze à l'annu, u CPS di Corti di 28 piazze è u liceu agriculu di u Borgu di 30 piazze.

E raghjò à mutivà di modu fundivu ciò ch'omu puderia chjamà un rinculu o un rinunciu à l'intrata attiva in a prufessione ripone nant'à una mancanza di pratica.

Certa, i sforzi da pruvà un vulgarizà di a teuria sò ludevuli, eppuru l'aspettu u più criticu ferma una scunniscenza di a pratica chì hè, à spessu, causa di l'angoscia è di u teme di u ghjovanu, chì s'interrugheghja nant'à l'eserciziu di u so mistieru di pettu à l'animali, di pettu à u produce o a messa in cultura. Per parechji, a furmazione si face troppu à a lestra, ùn hè à bastanza precisa, prufonda.

Ùn si tratta mancu à pena di criticà u travaddu tremendu di l'insignanti, ma piuttosto d'avvià un diplomu chì porta e sperenze d'una generazione nova chì hà brama à mantene una cultura, una tradizione, un metudu anticu di travagliu, chì culm'ellu hè anticu dumanda tempu, sperienza. Ùn si pò oghje prumove l'agricultura di qualità da vettore di a dinamica di a ruralità è di a so ecunomia è avè à tempu una furmazione à u BPREA inadatta à l'esigenze richieste da ste produzzione di qualità. A matrice prima chì porta a nostra riflessione per stu pezzu fundivu di a vita agricola hè a trasmissione di i sapè fà. Ciò chì face, hà fattu è ferà u successu di a nostra agricoltura è e so produzzione ch'omu ci invidia, hè u metudu di travagliu chì annu dopu à annu, ci hà permessu d'ottene sti risultati.

U ghjovanu chì porta un prughjettu in agricoltura, ùn puderà mai pussede sti sapè fà in un annu solu di BPREA o unipochi ghjorni in immersione in un pricoghju.

Hè per ciò chì seria una bona di mette in andatu un BPREA in alternanza, da permette à u ghjovanu di travaglià in un tempu a teuria è di praticà l'eserciziu di u mistieru in un secondu tempu, di modu praticu. L'alternanza ùn signifigheghja micca di modu obligu un tempu più longu, l'alternanza si vole quì u crucivia di a teuria è a pratica da permette à u ghjovanu d'acquistà e cunniscenze utile è bastante di u terrenu.

Eccu quì una pruposta forte chè duveriamu pruvà di modu sperimentale, sottu à a forma seguente. Si puderia tandu cunsiderà di stampà un "cuntrattu di generazione agriculu" chì in un quadru agroeducativu puru puderia vede un anzianu, in fine di parcorsu agriculu, trasmette sapè fà à u ghjovanu, chì puderia benefizià di e so preziose annate di sperienza è sapè fa, è avvià stu ghjovanu, à puntu nant'à una pussibile ripresa di quella splutazione, mediante l'investimentu umanu ch'ellu ci hà cussacratu durante quella fasa d'amparera pratica da acquistà ogni tecnica utile è tippica à u sviluppu di una produzzione di qualità.

Da finalizà ciò chè puderiamu chjamà un “BPREA ambiziunutu”, seria bè di fà appellu à finanziamenti adatti tale, per via di a CTC, un fondu di sustegnu à a furmazione agricula, chè piglierebbe a forma di una borsa à l’impiecu d’amparera agricula da garantisce una rendita curretta à u staziante.

Hè impussibile nicà l’impiecazione è a brama di i ghjovani in BPREA, parechji facenu assai sacrifici finanziari cum’è umani da stancià ciò chè ferma una passione più chè una professione.

Hè per quessa chè, un BPREA cù una forma d’alternanza duverà esse prupostu à i candidati da offre li una parte teorica più soda, è una alternanza cù immersione è un travagliu à mezu à un pricoghju cù un maiò, durante u tempu di pratica chè i professionale ghjudicheranu utile.

Essendu liata a furmazione à a tramandera di i sapè, hè di primura d’asestà un mudellu da rassicurà u pitizunariu offrendu li l’inseme di l’arnesi necessari à a realizzazione piena è colma di a so attività, in armonia cumpletta cù u so ambiu, a so cultura è e so tradizione.

Emu dinù custatatu chè parechji ghjovani, supratuttu in classe di terza, sò in brama di realizà stazi di scupertu professionale, seria d’accunsentu u mondu agriculu da prupone stu tippu di prestazione da fà scopre un mistieru, da creà vacazione ma supratuttu da apre a furmazione agricula à ghjovani chè ùn anu nisuna leia diretta cù u mondu agriculu.

Sta pruposta senza pretensione hà u meritu d’esse è di permette à i ghjovani stallati d’entre in quella curpurazione cù una tecnica chè li permette di fà u so mistieru, cù a tramandera di un patrimoni culturale agriculu, chè li pիրmetterà di mantene e tradizione.

I.2. A SCELTA DI L’AGRICOLTURA

Hè l’arradichera à u sviluppu di a nostra terra chè spieca chè oghje a ghjuventù isulana si giressi versu stu grande mistieru. Aldilà di e chjachjare u mistieru d’agricoltore hè à tempu fastidiosu, penibule è passiuante assai, ciò chè move a nostra ghjuventù hè di mantene un sapè fà, una tradizione antica uriginale, di prудuce prudutti labellizati, certificati chè arricchiscenu i nostri territorii.

L’agricultura corsa ùn si pò cuncepì rinchjosa nant’à sè stessu, i so sapè fà sò ricunnisciuti, eppuru ùn hè mancu à pena ostile à a mudernità.

U mudellu agriculu hè cuscente è bè chì certe speculazione abbisognanu arnesi meccanichi muderni è un sistemu di produzione in fasa è bè cù i prugressi tecnici. L'agricultura corsa bagna in l'ambiu chì l'ingira, ùn campa rinchjosa, puru hè impastata da e so tradizione , di u passatu è si gira versu l'avvene, a mudernità è u seculu XXI.

À ghjornu d'oghje, nunda oppone i sapè fà è a mudernità, à u cuntrariu, u mondu agriculu seria ancu felice di pudè gode arnesi muderni, chì facilitateghjanu e faccende d'ogni ghjornu sempre mantinendu e tradizione.

A rinomina di a nostra isula s'hè fatta, aldilà di a so natura magnifica, grazia à l'agricultura, à i so prodotti di purtata europea: u mele di Corsica, u brocciu, i casgi, a salumeria, i so agrumi è i so vini, hè per ciò ch'ellu ci vole à avvià quelli chì sceglienu di piglià sta strada versu un sistemu di splutazione mezane, in prupurzione cù u territoriu ma supratuttu puliattive da garantisce un valore aghjuntu forte. Fendu stu mistieru, tramandanu a tradizione di i so maiò, à modu soiu, travaglianu di modu sicuru à u spannà di u so territoriu è per ciò chì, da rende a so dinamica à a nostra ruralità, ci vole à aiutà li.


A dualità Qualità/Identità hè liata à a stretta à u sviluppu agriculu di a nostra isula.

I.3. A STALLAZIONE

U schema di a stallazione hè a chjave di l'affaccata in u mondu agriculu, è hè quì chì piglia a so impurtanza vera u rollu di u Puntu Info Stallazione, accumpagnendu u ghjovanu agricoltore in u so percorsu sanu.

Sta struttura labellizata, sola autorità competente da stallà quelli chì anu prughjettu in l'agricultura hè u crucivia, a piattaforma suciueconomica d'ogni ghjovanu è u so rollu hè a so accolta, u so avvià è u so infurmà da finalizà u so prughjettu.

U schema di a stallazione si sviluppa cusì :



Benchè ellu sia ditagliatu stu percorsu per a stallazione, tenendu contu di l'impurtanza di l'agriturismu è di i sbocchi propii à e produzione, bisognu à riflette à l'aghjustu di una furmazione

forse data da u Puntu Info Stallazione in quantu à u diversificà di l'attività, è dinù una furmazione particolare per u prumove è u valorizà di i prudutti agriculi.

Per via di a debbulezza di i partenari bancari, seria una bona riflette dinù à una presenza d'accumpagnà drentu à a cummissione bancaria da sustene u campà di u prughjettu è studià a messa in andatu di un barema di l'impresti o un coimprestu cù e cullittività in u quadru di u rivitulì di u rurale.

Malgratu una terra cù pussibilità numerose, i freni à a stallazione sò parecchi, venenu per u più da u non accessu à u fundiaru.

Di sicuru, e caghjò sò multiplice, prima di tuttu l'assenza d'ammaistrà di u fundiaru, a mossa di l'anziani per u perseguì di a so attività. Ste situazione inghjenanu un ritardu sicuru in a tramandera di i pricoghji è di fatti, u costu di u fundiaru chì, da a scarsia, diventa caru di più.

Hè chjara chì unu di i mutivi chì frena l'impegnu in a stallazione tene in a mancanza di fondi propi (finanziari è in capitale), pare incertu di sullicità un ghjovanu chì principia a so vita è di dumandà li d'avè a tesureria, ch'omu pò avè dopu à parecchi anni di travagliu, ghjà dispunibile.

Per quessa, vistu u sustegnu insufficiente di u sistemu bancariu, ci appartene à noi, l'inseme di l'attori di a professione, di rannudà leia è fiducia cù i finanziari.

Solu splutazione campatoghje, qualitative, atte à produce elementi di qualità, ci permetteranu di vince sta battaglia per l'investimentu. Di sicuru, sempre esisteranu incertezze è esitazione, puru hè in u mustrà di questu tippu di pegnu ch'ellu si puderà rinfurzà quellu filu di l'intesa è di l'impegnu bancariu. Fermanu quantunque sempre in mente à parecchi l'errore di u passatu.

Postu quellu custatu, e prublematiche enunziate, qualesse sò e soluzione chì permetterebbenu l'ottimizà di l'attrattività di e stallazione à u livellu isulanu ?

Dopu à e numerose ascoltere ch'emu fattu ci hè parsu à tutti necessariu u simplificà di i percorsi di stallazione, fendu li penibule di menu, menu acuti à un livellu amministrativu, vicini di più, chì u schema di e strutture chì fissa e superficie di stallazione pare cusì cumplissu per un ghjovanu chì affacca nant'à quella piattaforma di a stallazione.

Aldilà di quessa, ghjè in u prumove di i mistieri di l'agricultura corsa, in u rinforzu di i partenariati trà l'urganisimi di furmazioni è quelli prufessionali agriculi chì a putenza d'attrattività puderà esse cresciuta.

In stu principiu in a vita agricola, u ghjovanu stallatu deve sempre avè à mente l'idea di valorizà a so splutazione strutturendu la à u massimu. A messa in valore di un pricoghju pò piglià parecchie forme

tale a costituzione di un elemento di u pricoghju in muntagna, l'alzà di bastimenti è rimesse agriculi chì cumplettau l'attività stessa di a splutazione.

Ma cumu parlà di a stallazione scurdendu si ne di u so pendente u diversificà ?

Vista a superficie di e nostre splutazione, pare oblicu, da sparghje a qualità, d'avvià si ver'di rete di commercializzazione corte, di tippu tavulini d'ospite o camare d'ospite, sviluppendu dinù una reta corta di distribuzione.

Cum'è evucata anzora, a messa in piazza di un agriturisimu ammastratu, urganizatu nentru à una reta, suprapù di l'attività agricula, hè utile patti è cundizione chì st'attività agrituristica ùn diventi l'attività principale di u pricoghju.

L'agriturisimu ammastratu ùn hè sclusivu d'un travagliu intrecciatu. Hè di primura chì, nentru à rete corte ci sia una vera cuerenza è una maestria, un intrecciu di i circuiti da un urganisimu cuurdunatore è certificatore.

A ricunquista di i territori rurali passa per a più gran' parte per quellu tippu d'assiomi, appropriendu si torna u nostru patrimoniu. Quant'è splutazione vedenu muri, mulini, fragni andà si à a ruina?

U rinnovu di stu custruitu agriculu, tistimunianza di a storia, vistiga di u travagliu di i nostri maiò si deve perseguì, in particolare per via di misure d'incitamentu, in u quadru di a ricunquista di u patrimoniu rurale.

Ste precunizazione vanu in u sensu di una stallazione in florisì, campatoghja, di un prughjettu chì caugiunehja brama è vuluntà di mantene ciò chì adunisce a Corsica, e so tradizione è a so cultura.

I.4. L'ESERCIZIU DI U TRAVAGLIU AGRICULU

Compiu stu percorsu di u stallà, bisognu à riflette à u mistieru stessu di l'agricultore, à pruvete à l'agricultore arme à u massimu da rende campatoghju è da stende a putenza economica di u pricoghju ma soprattutto bisognu à definisce un quattru à a furmazione professionale, aldilà di e furmazione sviluppate à livellu di i CACES, EB, Rimorche, Camiò, FIMO.

L'avviera nova deve purtà verdi furmazione più tecniche in partenariatu incù strumenti cumè l'AFPA, si duverà avvicinà dinù altre furmazione nuvatrice in leia cù i sbocchi cummerciali, a valorizzazione di a produzione da u marketing è a cummunicazione, a gestione finanziaria è fiscale di u pricoghju.

A furmazione hè à veru u cursore u più interessante per ciò chì tocca l'avvene di u pricoghju. Di modu fundivu hè necessaria una rimessa à ghjornu tantu di e tecniche di produzione chè d'espensione. U tramandà di un pricoghju ùn si face solu à livellu di u patrimoni u custruitu, si face dinù à livellu di u sapè, di a tecnica è di l'inseme di i mezi chì anu cuntribuitu à u so spuntà.

I.5. U TRAMANDÀ DI U MISTIERU È L'APRUNTÀ DI A RITIRATA

S'è a stallazione ferma un evenimentu fundivu in a vita di un agricoltore, chì hè a so entrata in a vita attiva, si sà chì u tramandà si ferma una tappa impurtante.

Hè stu mumentu specificu indù s'aliena una parte impurtante di l'investimentu umanu. Un pricoghju ùn sò solu l'animali, hè dinù una storia, un vissutu, un metudu di travagliu, u bilanci u di una evuluzione in quantu à u bistiame, à u campà, à u strutturà.

Da esse prammaticu in u nostru raghjuna, scumettimu chì i più di 50 anni (68%) ùn pussedenu successori per u so pricoghju. In i pricoghji maiò, hè impurtante di più u percentuale di successione cunnisciutu (55%) ma solu un 13% sò cuncernati. In i picculi pricoghji, u percentuale d'incertezza ferma altu, 75% frà i quali 15% sò cuncernati.

Da u livellu bassu di e so ritirate, l'agricoltore sò custretti à attempà a so partenza è à cuntinuà a so attività da gode rendite alte di più. Sta situazione frena a tramandera di u fundiaru è dunque a stallazione di i ghjovani agricoltori.

U statutu fiscale di l'agricoltori ferma dinù un elementu da piglià in contu sapendu chì e cutizazione di l'agricoltori sò calculate nant'à a rendita fiscale.

Cusì chì un 71% sò imposti à tagliu cù e cunsequenze di un impositu più bassu ma dinù un contu di i punti minimu, ciò chì face una ritirata bassa.

U muntante mediu di un impositu à stagliu annincu hè di 3400€, è 29% si dichjarenu à u reale, ciò chì permette di cuntabilizà l'investimenti fatti nant'à u pricoghju. A situazione hè à l'arrinversciu di quella naziunale duve un 75% di l'agricoltori sò à u reale.

U muntante di e ritirate hè funzione di a durata di a carriera, e cutizazione pacate è u rivenutu fiscale dichjaratu à a MSA chì fissa u contu di i punti anninchi per a ritirata prupurziunale.

Oghje u contu di stallazione ùn basta da assicurà u rinnovu di a professione: 40 stallà aiutati contru à 120 partenze à a ritirata ogni annu. Sta situazione affosca di più a questione di e successione à i pricoghji.

E cutizzazione di l'agricultori sò à paru di quelle di l'altre categurie suciale professionale, u percentuale di i prelievi suciali hè di un 42%. Sò calculati i prelievi nant'à u muntante fiscale dichjaratu.

A tramandera ci cunfronta à prublemi è ci schjarisce a cundizione di l'agricultore. Ci vole quantunqua à rammintà si chì s'è u mistieru d'artigianu di a terra hè nobile assai ùn impedisce u fattu chì parechji si trovanu in una situazione di precarità cusì impurtante ch'elli benefizieghjanu di u rivenutu di sulidarità attiva, ciò chì palesa a debbulezza di quellu ambu.

Per ciò chì tocca à u rinnovu di a professione, da ristabilì un equilibriu in u futuru, sola una dinamica da incresce u contu di stallazione (trà 55 è 70/annu) ci permetterebbe di culmà à pocu à pocu u nostru ritardu è in fine di inizià un rialzu chì ci hà da permette in u tempu di sbilancià e partenze à a ritirata è i ghjovani stallati. Hè una sfida, a sfida stessa chì deve adunì u mondu agriculu, hè dura a scumessa ma ùn hè impussibile.

Ci ripetimu ma simu furtunati d'avè una ghjuventù arradicata à i valori isulani, à e tradizione, ci vole à fà opera di pedagogia ver'di ste pupulazione da puntà li à fa prusperà e radiche di a nostra terra.

Per ciò abbisogna favurizà a ripresa di pricoghji da ghjovani agricoltori (fora di l'ambu familiare), incù aiuti incitativi à a partenza à a ritirata (prima di partenza), aiuti à cuntrattà affitti o CMD (Cunvenzione di Messa à Dispusizione, prima à l'ettare) è presa in contu di e spese di geometru.

Oghje nimu pò nicà e difficoltà di u mistieru, una scumessa maiò hè di travaglià di modu culleghjale à l'avvicinà di a ritirata agricula, parlà di a prublematica di u strazievule di u travagliu, di l'età di a partenza, d'una presa in contu di u fondu malatia più bona, d'una paca più impurtante via a creazione di un fondu di sustegnu è di megliurà di a rendita agricula, vie pruposte è identificate chjaru chjaru in partenariatu cù e cullettività.

A ritirata essendu tangente à a tramandera, pare impurtantissimu di rivede u sistema fiscale di i pricoghji, d'esse attenti à a messa in andatu di dispositivi incitativi in termine di crediti d'impositi o d'aiuti à l'impieca atti à rilancià una dinamica rurale nova.

A manu d'opera agricula hè ricerca assai, seria una bona un alligeri di e cutisazione suciale per i ghjovani agricoltori.

I.6 L'INDIBITÀ AGRICULU

In fine u latu suciale di u debitu agriculu ùn po esse schisatu perchè ripresenta più di 90 milioni d'euri d'arritrati, cumprese e penalità è magiurazione.

U percentuale di u recuperu di e cutisazione s'hè megliuratu assai, tocca à ghjornu d'oghje un 86%, ma ferma assai più bassu chè a media naziunale, un 97%.

L'annu 2012 micca cumpresu, u saldu di u debitu s'incresce à 46 milioni, per u più debiti chè correnu nant'à parechje decenie.

Nutemu chè circa 15 cartulari sò debitori di più di 100000€ ognunu, sia un 57% di l'arritratu di a MSA corsa.

U debitu suciale hè custituitu d'à pocu pressu 5000 cartulari, numeru chè si spiecà da l'anzianità di u debitu, da ciò chè certi sò debitori à tempu di cutisazione persunale è salariale, è quessa à spessu nant'à periudi calindari numerosi, da u cessà d'attività agricula di unipochi aderenti (cambià d'attività, incapacità, ritirata), ma ch'elli fermanu quantunque debitori di cutisazione.

Ci pudemu quantunque lagnà ci chè e varie misure pubbliche di sdebità abbianu permessu l'arregulà d'una parte sola di u debbitu suciale.

Cusi, 833 cartulari sò stati dipusitati à titulu di a misura 122 (lege di finanze rettificatrice per u 2005), eppuru tenendu contu di e regule d'eleghjibilità fissate da i testi, 551 piani sò stati accurdati.

Una altra misura gestita da a MSA, e misure "AGRIDIFF" chè permettenu à l'agricultori di gode un creditu sguassendu, secondu un massimu stimatu à 3800€, e cutisazione suciale legale. Sta misura deve quantunque riceve l'avvisu favurevule di a CTOA.

Fendu contu di l'anzianità di u debitu è di l'imbrogliu di e sferente misure, a MSA duverà publicà un censu chjaru chjaru di a realtà di e credenze è di una pussibile prescrizione.

L'arregulà di u debitu suciale si deve fà di modu chjaru assai cù i professionali, i servizi di u Statu da spianà l'inseme di i cartulari liticati pruvendu dinù d'urganizà un recuperu veru di i debiti accertati.

Malgratu i so effettivi custretti, a MSA mostra quantunque una azzione cutidiana in ambu rurale, i 119 milioni d'euri di prestazione suciale pagate ogni annu s'aghjustanu da offre à l'aderente un serviziu più efficace, azzione suciale di terrenu è dinù azzione di prussimità.

Bench'elle sianu state create misure da sdebità unipochi agricoltori, a maiò parte, perch'elle eranu restrittive troppu, ùn anu benefiziatu à tutti è in soprapiù, unepoche, tale a 122, ùn anu apertu diritti à a ritirata per l'anni cuncernati. Puru hè stata nutificata à l'agricoltori ch'elli pudianu, da voluntariu, arregulà e so "cutisazione ritirata" per l'annate incausate.

Bisognu à ùn cunfonde quì e misure di u sguassà di u debitu suciale ch'è anu purificatu a situazione di parechji è "l'annuità ritirata" ch'ellu ci vole à cutizà è ch'è e misure appiecate ùn valutanu mancu à pena i punti per ritirata.

S'usserverà d'altronde ch'è i testi di securità suciale scudenu u riscattu di e cutisazione, eppuru hè sempre pussibile di pacà cutisazione di ritirata micca arrigulate.

II- E FILERE

A pulitica, detta di e filere, hè stata iniziata da l'ODARC, u scopu era di risponde megliu à i bisogni d'ogni filera è creà ci un sviluppu durevule.

A filera di l'allevu ferma quella chì scontra u più intoppi, in particolare in quantu à l'elleghibilità di e superficie cù un arrestatu prifetturale chì, rinnuvatu ogni annu, permette di scioglie unipochi frastorni in quantu à a forma ma ùn risolve u fondu di u prublemu.

U fondu di u prublemu, hè à puntu a ricunniscenza di e superficie di machja è e mosse è a definizione di a strata erbigna. Numerosi territorii nostri in zone di mezana è alta muntagna sò di sicuru spazii senza erba, ma ci si pò attestà un toltu prova certa di un passaghju di u bestiame.

Da infurmazione, ste superficie ripresentanu 12980 ettari nant'à 45000, sia 1/3. Nimu pò nicà oghje chì stu prublemu d'elleghibilità di e superficie hè statu aguantatu da l'eletti è l'uganizzazione prufessiunale. Hè statu intrapresu un lobbying forte assai versu u Ministeru di l'Agricoltura è u Guvernu francese prova una pressione forte versu a Cumissione europea da ch'ella sia a più larga pussibile a definizione di l'elleghibilità di e superficie è chì e specificità regiunale possinu esse ricunniscute da turnà i nostri svantaghji in vantaghji.

Una filera si pò sviluppà solu sè i precoghji sò à bastanza perenni è campatoghji da fà cresce stu sviluppu. Hè cusì chì a difficoltà di maestranza di u fundiaru vene à gallu in a maiò parte di i casi per causa d'affitti urali è precariaires.

U schema di sviluppu pasturecciu custituisce una risposta parziale à a dinamica di a filera vegetale, in particolare in quantu à u strutturà è l'evoluà di u pricoghju versu a messa in andatu di una cellula di u fenu.

II.1. E FILERE ANIMALE

a) *A filera vaccina*

Per l'ultimi deci anni, sta filera hà cunnisciutu un scambiamentu pusitivu tantu in termine d'effettivu chè di spezializzazione.

Sò cusì dichjarati 68000 vaccini, chjosi è gestiti da e Camare d'Agricoltura. Eppure sta filera ùn costa chè pochi aiuti à l'investimentu, in particolare per raghjò d'una assenza d'unità di trasfurmera. A difficoltà maiò di sta filera ferma a divagazione di l'animali cù à ghjornu d'oghje trà 15000 è 20000 vaccini micca chjosi chì giranduleghjanu nant'à e strade isulane.

Affacca una volta di più u prublemu di u strutturà di i pricoghji incù lochi senza serrende chì lascenu passà e bestie. Deve esse fattu un sforzu da schisà e pulemiche chì ingonfianu in i territorii à prupositu di i diversi accidenti stradali incausati da i vaccini.

Tantu, sta filera pussede un potenziale di sviluppu veru in particolare da l'incresce, quì dinù, di una offerta di qualità ma dinù di un metudu di l'allevu chì permette di cummercializà 40000 o 50000 vaccini nati è allevati in Corsica.

In agricoltura, cumè in tutti i dumini in Corsica, sta filera deve esse dutata di un ecchippamentu strutturante chì permette a crescita di e so prospettive di mercatu, in particolare da u megliurà di i tumbatoghji è a creazione d'attelli d'appizzera novi.

Tantu, sta filera vaccina si duverà agruppà in interprofessione, una dimarchja iniziata da *Corsica Vaccaghji* dà pruve li forza è cuesione. Ogni travagliu fattu in u sensu di l'ottenimentu di certificati o labelli, tale a dimarchja d'ottenimentu d'una *AOC vitellu di Muntagna*, segni d'una ricunniscenza bona, merita d'esse felicitatu. Hè cù a definizione di un prughjettu tecnicu strutturante, in particolare creendu e cundizione d'una adesione di l'allevu vaccinu à a razza corsa, ch'ellu si surterà da u fossu. Impussibile di scurdà si dinù di a necessità di realizà un travagliu veru da megliurà u dinamismu di e cuoperative- unepoche avendu un quadernu di cariche troppu restrittivu.

Apri à tutti l'allevadori, fà una piazza à ognunu hè una imperia necessità. Sta filera merita una allarghera, merita ch'omu li porti a cunsiderazione è i sforzi di messa in cumunu necessari.

Hè l'unione di i partenari in giru à un prughjettu chjaru, d'accolta, di qualità, indù tuttu ugnunu si pò sprime ch'ellu si ghjunghjerà à fà ne un prughjettu di prima trinca.

b) A filera purcina

Hè senza dubitu una di e riescite di l'agricultura isulana. Hà dimustratu sta filera, da a so successu in u 2012 di l'AOC (Apellazione d'Origine Cuntrullata), à mustrà a so capicità à strutturà si è a so unità in giru à un pruduttu chjaru, labellizatu è autenticatu.

Ben chì sta filera appia dapoi parechji anni una maghjina pusitiva assai, in particolare da a qualità di a so produzione, u labellu AOC li hà da dà un veru colpu d'accelerazione.

Hè in corsu oghje una convenzione di partenariatu cù i Baschi nant'à i metudi d'affinera da fà di u nostru pruduttu un argumentu di vendita superiore, di stessu modu chè ciò ch'elli anu fattu i Spagnoli cù a Pata Negra.

Omu si pò quantunque lagnà chì, malgratu l'AOC, solu un 15% di a produzione sia esciuta da l'allevu locale, cù una origine di a carne per un 85% da u fora incù origine diverse. Hè à colpu sicuru unu di l'assi maiò da megliurà da perennizà sta marca di qualità, chì di sicuru hè una avanzata tremenda, ma ci tocca à circà soluzione nove da francà ci di sta ghjunta di carne venuta da u fora.

Parechji attori ci anu dinù privenutu chì u fattu d'ùn prудuce alimentazione sopra locu era un frenu à u sviluppu.

Si puderia cunsiderà duie soluzione, a produzione di cereale sopra locu sapendu chì tutti i territorii ùn sò adatti à una produzione di granu o granone, ben chì terre micca sfruttate in Balagna anderianu bè à ste culture, è una calata di u costu di produzione da a creazione di gruppamenti di compra, cù una unità d'accantera agradata da permette l'accessu à u mercatu mondiale è l'assicurà di un cuntrollu di l'alimente furnitu.

c) A filera pecurina

Si tratta di una filera tradizionale corsa indù 70% di u latte hè trasformatu da e latteria è 30% da i pastori per a vendita di i so prodotti.

À livellu di a produzione di latte, u centru di selezione direttu da l'OLOCC (l'interprofessione lattaghja pecurina caprina corsa), hà fattu e so prove tantu in termine di risultati tecnici chè nant'à un pianu geneticu o à livellu di a produzione. A produzione media per i pastori aiutati à livellu tecnicu hè di 140L, invece hè di 80 à 100 L per l'altri.

Ste scifre palesanu, di modu certu è sicuru, u megliurà di a produzione quandu i pastori sò accumpagnati in u strutturà di u so pricoghju è u so modu di produzione, e scifre palesanu u megliurà di a produzione. Puru, i freni à u sviluppu di sta filera stanu in u costu troppu altu di l'intrenti è in un sistemu d'aiuti chì ùn piglia in contu e realtà è specificità territoriale creendu cuncurenza trà e filere.

U sustegnu à a produzione di l'alimentazione pìrmetterebbe à i pastori di riduce e cariche liate à l'importu di l'intrente, ma aldilà di a nostra incapacità in i fatti à a produzione di fenu, un sustegnu impidiscerebbe, di fatti, a pascura nant'à e terre. L'ughjettivu per sta filera hè d'andà ver'di una autoproduzione da limità u pesu di ciò chì entre.

d) A filera capruna

Si tratta d'una filera cù una maghjina positiva assai è un valore aghjuntu altu alltu chì conta 40000 teste per 300 produttori.

Eppuru sta filera cunnosce assai prublemi d'effettivi ben chì essendu l'allevu estensivu caprunu adattu di modu perfettu à e nostre zone di muntagna è ben chì a dumanda di latte sia impurtantissima.

S'aghjusta à què una difficoltà sanitaria cù malattie senza palliativi chì, vistu u numeru debule di a pupolazione capruna, mubilizaghja pochi mezi.

Pate sta filera dinù una mancanza di strutturazione, in particolare l'assenza di una dimarchja cuncertata è cumuna chì frena u so sviluppu.

Elementi di soluzione chì puderebbenu permette u megliurà di sta filera stanu in un tippu di sviluppu di l'allevu caprunu chì sia in leia cù l'ambiu, a cultura, e tradizione.

Ci tocca à incalcà u travagliu di selezione da risponde à a dumanda impurtante di latte, rende sicuru a produzione in quantu à e rendite è a sciffra. Sò a ricunniscenza di a razza corsa capruna è u modu d'allevu i guaranti di a tracciabilità.

Di modu generale, a filera lattaghja pussede immense risolve tantu à livellu di u centru di selezione di a pecura corsa chì produce veri risultati tecnici chè di e piccule fabbriche artigianale lattaghje chì arricoglienu u latte è chì, cù u so mudernizà, serianu capace à assorbire u latte pruduttu in Corsica è à schisà a saturazione di u mercatu.

E dimarchje di qualità per via di l'AOC Brocciu o AOP per i casgi, Niulinu, Venachese, Sartinese, Calinzaninu è Bastelicacciu, facenu a prova di a ricunniscenza di sti prodotti esciuti da sta filera.

Simu quì in core, in u filu, di a nostra riflessione, cù pricoghji poliattivi, capace à sviluppà produzione certificate è di qualità chì facenu a so rinomina propria ma dinù u valore di u so territoriu.

Si pò cunsiderà chì sta dimarchja hà da cuntribuisce à arradicà e popolazione è à rende una dinamica à i nostri territori rurali è ci porta ver'di una territorializzazione di qualità.

Malgratu u cuncretu di ste risolve, impettemu, quì cum'è per l'altre filere, un difficiule accessu à u fundiariu, à una sottoproduzione lattaghja, per u più per u pecurinu è à impurtanti importi di latte, per raghjò u caratteru estensivu di l'allevi è una mancanza cruda d'unità di produzione d'alimentazione.

Hè à puntu sta mancanza d'una filera d'alimentazione chì custituisce un frenu à a cumpetitività di i nostri prodotti, in particolare da l'importu di fenu è u so costu pruhibitivu.

Per ch'ella si sviluppi una filera di l'alimentazione è chè no diventimu autonomi in u tempu, ci vulerà, di modu imperativu, d'una parte ammaestrà l'anacquera prupunendu furmazione à e tecniche di l'annacquera, è d'una altra parte limità i costi chì sò par avà determinati da l'abbunamentu è u tiru sottoscrittu. Ci vulerà dinù à fà un sforzu da pudè utilizà e terre sottusfruttate da fà campà sta filera.

S'ella hè pussibile d'accresce e puntenzialità di sta filera, ci vulerà à sviluppà u mercatu calendu l'importu è sviluppendu l'esportu.

Sò tanti vettori di sparghjera di a filera lattaghja u sustegnu à una diffusione genetica, è dinù u megliurà di a pruduttività di i pricoghji, u sustegnu di e scelte tecniche è u cundiziunà di l'aiuti per a produzione è a furmazione.

e) A filera apicula

A filera apicula isulana conta più di 300 produttori frà mezu 80 producenu sottu à una Appellazione d'Origine Cuntrullata (AOC). A produzione glubale di mele stimata à 348T. Da mantene una cuerenza in a so strategia di sviluppu, u Sindicatu AOC *Mele di Corsica* si deve di :

- Rinfurzà u so rollu in quantu à a stallazione ;
- Accumpagnà l'apicultori in a so maestria tecnica di a so splutazione, in particolare per cò chì tocca à u rinnovu di l'essami è u so accresce per a stallazione ;

- Mette in andatu una strategia di u cummercializà à trè lati :
 - Prumove l'AOC,
 - Rinforzà u pruduttu nant'à u mercatu locale,
 - Messa à nant'à u mercatu fora di l'isula.

A finalità palesa da u Sindicatu AOC *Mele di Corsica* hè di fà di a produzione apicula AOC una attività nutrice di u sviluppu rurale per tutti i so cumpunenti ecunomici, sociali è ambientali.

II.2. E FILERE VEGETALE

E filere vegetale cuncentranu in generale di menu difficoltà, ch'ella sia par l'urtaglia, l'agrumicoltura o a viticoltura. Si sbucinanu cum'è filere nobile di l'agricultura isulana. Bisognu à nutà chì un veru travagliu di certificazione è di valorizà di e produzione hè statu realizatu, sò oghje i prodotti rè di a nostra agricoltura.

Serà interessante assai di fà u censu sanu sanu di ciò chì hè produttu è di misurà ne l'impattu pusitivu, una analisa sintetica vera è una critica s'imponenu dinù. U scopu, una speculazione dopu à l'altra, hè di fà u custatu, è hè primurosu di mutivà pruspette.

a) A viticoltura

Hà persu a viticoltura st'ultimi 40 anni circa 25000 ettari, eppuru grazia à i diritti novi di punera, sta filera s'hè guadantu circa 200 ettari dappoi 5 anni. In più u Pianu di strutturà novu chì v'è da u 2013 à u 2014 hà da risturà 750 ettari di vigna.

In u 1996, cù a creazione di l'Unione di i Vignaghjoli di l'Isula, s'hè messu in andatu u primu spurtadore di l'isula. Addunisce un 45% di a produzione isulana, agruppa 250 viticultori è 120 salariati. Omu ùn pò chè sciaccamanà stu tippu d'iniziative chì, partendu da u raghjumentu semplice "unione face forza" permette di fà di sta filera a lucumutiva di e speculazione vegetale.

Oghje sta filera occupa 7000 ettari, è sò 400 vignaghjoli chì facenu vinu in 120 cantine sfarente.

A sciffra fatta da sta filera, a prima di l'isula, hè di 125 M€. A viticoltura hè dinù monopolistica cù 90% di i vini in l'usteria isulana è 70% in a grande distribuzione.

U successu di sta filera tene dinù in un vignetu chì s'hè sapiutu ristrutturà di modu perfettu ancu s'è ellu s'hè cambiatu i calzi posti. I vignaghjoli corsi l'anu capita bè quand'elli anu sceltu di rimette à a moda anziani ceppi lucali cum'è u Biancu Gentile, l'Aleaticu o u Barbarossa. Da ste particolarità di i ceppi è u so splutà vene l'uriginalità di i vini corsi nant'à i mercati.

L'ultime vindemie anu datu un volume di produzione di circa 375 325 ettolitri frà mezu 64% in IGP è 30% in AOC-AOP. Nutaremu chì a produzione di vini AOC-AOP hè stata tocca di più da a sminuita di e superficie.

Eppure a produzione viticola AOC/AOP si sbucina cusì :

<i>Zona d'Appellazione</i>	<i>Superficia (E)</i>	<i>Produzzione (el)</i>	<i>Redita (el/E)</i>
Patrimoniu	405	13919	34
Aiacciu	259	9648	37
Muscatu di u Capi Corsu	86	1696	19
Vini Corsica Calvi	217	8489	39
Vini Custatu di u Capicorsu	23	969	41
Vini Corsica Porti Vechju	87	2911	33
Vini Corsica Figari	131	5207	40
Vini Corsica Sartè	187	7566	41
Vini di Corsica	1342	61722	46

A produzzione di i vini in IGP (anziani Vini di Paese) si stima à 234 360 ettoltri, partendu da un custatu è una bunissima crescita di i vini chjarasgini chì ripresentanu più di 60% di a produzzione viticola, a moda di i vini chjarasgini usservata da numerosi sperti, hà permessu à a Corsica è i so vini di truvà una piazza prediletta à l'espurtazione, incalchendu u fattu chì un 9,6% di i vini chjarasgini vinduti in Francia sò vini corsi.

Si pò dinù sottulineà l'arrecu di a filera viticola biologica chì adunisce 31 vignaghjoli cù una superficia di 600 ettari.

b) L'agrumi è frutti à chjoppule

2000 ettari sò oghje cussacrati à sta filera chì conta una centina di splutazione chì raportanu una scifra di 45 ME.

A clementina corsa

L'agrumicultori sò urganizati benissimu è pruducenu 20 000 tunnelate di clementine, in particolare da u sviluppu di marche di qualità tale l'IGP (Indicà Geugraficu Prutettu).

A filera clementina rapresenta ella sola 1600 ettari di superficia d'arburetu frà mezu 1300 ettari à prò di una produzione urganizata. U contu di i pruduttori soci di l'associu APRODEC⁴ chì porta a segna di qualità IGP "Clementina di Corsica" hè di 130 nant'à un tutale di 150 pruduttori. A produzione cumercializata hè in media di 20000 tunnelate à l'annu, 90% di a racolta hè espurtata nant'à u cuntinente (Nizza, Tulò, Avignon, Cavaillon, Nîmes, Marseglia è Rungis). Da un puntu di vista tecnicu, l'arburetu corsu di clementine hè sanu sanu meccanichevule per a cultura è a racolta. Hè statu trasfurmata l'arburetu da prugrammi di punera è di strutturà, eppuru bisognu à rimarcà chì più di a metà di e superficie anu più di 20 anni.

E zone favurevule à a cultura sò identificate è ben chì elle sianu situate in zone limitu di latitudine nordu, e so capacità di produzione sò ricunniscute.

L'arburetu hè annacquatu è, fora di circustenze eccessiunale, dispone d'abastanza acqua.

I principali cunsigli tecnici da produce qualità sò definiti è messi in andatu.

A pruduttività media cumercializata avvicina e 20 tunnelate à l'ettare, puru, à mezu à arbureti anziani ferma in giru à 400 ettari di a varietà lucale cumuna inzitata nant'à aranci stupponi pocu atti à dà raccolte regolare è di qualità.

L'età media di i pruduttori hè di più di 50 anni è l'11 ghjovani stallati st'ultimi anni ùn ponu ripresentà un percentuale di rinnovu abbastante.

A professione hè strutturata in giru à sette urganizzazione di pruduttori ricunniscute, una hè specifica à a cultura biologica.

Per l'ultimi trè anni, dui eventi maiò anu rinfurzatu u strutturà professionale :

- L'uttenimentu di e marche ufficiale di qualità CCP⁵ et IGP "clementina di Corsica" in u 2007 ;

⁴ APRODEC : Associu prumove è difesa di a clementina corsa.

⁵ CCP : Certificatu Cunfurmità Produttu

- U pianu di rilanciu di a filera custruitu in giru à u cumitatu ecconomicu di bacinu di e frutte è ligumi, cù u sboccu d'azzione cullettive à prò di un strutturà di a reta d'infurmazione da nanzu à dopu a produzione è à sviluppà a rinomina è a situazione cumerciale di u pruduttu certificatu.

Sta filera, da sviluppà si, deve di modu imperativu tene a so putenza produttiva, mettendu in rileviu a prumuzione di a clementina corsa IGP è rinfurzendu u so strutturà in quantu à u cundiziunà, l'inviu è u cummercializà.

In u so insemi, sta filera resiste bè, u corsu di a clementina corsa si mantene à un livellu altu di più chè quellu di i cuncurenti malgratu a pressione cumerciale di u Maroccu è a Spagna; 80% di a produzione hè cummercializata sottu à i labelli IGP è Agricoltura Biologica, puru sapendu chì i sforzi qualitativi realizzati da l'Urganizazione di i Pruduttori è u valurizà da l'IGP, portanu i so frutti.

U Pomelu

A filera di u pomelu conta 230 ettari di produzione, per circa 55 splutazione. 45 sò urganizate in l'associu d'urrganizazione di i pruduttori "Frutti di Corsica" è splotanu 165 ettari. U cummercializà hè basatu forte forte nant'à l'esportu. A filera hà in mira una ricunniscenza ufficiale di a so qualità sottu à a forma di una IGP.

U periudu di vendita, da maghju à lugliu, si trova in cuncurenza cù a produzione israeliana.

U volume tutale pruduttu hè stimatu à 3640 tunnelate, 3000 cummercializate da l'OP Frutti di Corsica è 640 tunnelate fora di e strutture professionale.

U Sud Este ferma u locu di messa nant'à u mercatu u più impurtante (91% di a produzione), l'esporti ripresentanu un 3% di e vendite.

U corsu di u pomelu hè firmatu stabile malgratu a cuncurenza di l'altri paesi.

A Nuciola

culture, u prumove è a valurizazione di u nucioletu.

Conta 126 aderenti è hè cumposta in a so maiò parte da pruprietari cuglidori, i sfruttadori agriculi essendu pocu numerosi. A produzione di nociole hè à spessu una parte in sopra più di l'attività.

A raccolta hè stimata à 136 tunnelate, per una media di 87 tunnelate da l'aderenti d'A Nuciola. A bunissima valurizazione per i pruduttori di u prezzu di u chilò di nuciola à chjoppula hà inghjennatu una crescita di fattu di u contu di l'aderenti è di a raccolta.

U cartulare di ricunniscenza di l'IGP "Nuciola di Cervioni" di l'APRODEC hè avanzatu bè da esse ottenuta in u 2012.

Da u 2004 à u 2010, splosa u numeru di l'aderenti quant'è a produzione, hè passatu da 20 aderenti à 140 in sette anni è da una produzione moltiplicata per cinque, da 15 tunnelate in u 2004 à 87 tunnelate oghje.

L'amandulicultura

A superficia di l'amanduletu isulanu hè stimatu à 570 ettari per un effettivu di 65 sfruttadori. In Francia, a Corsica hè u primu rughjone pruduttore d'amandula. A filera regionale hè strutturata da un GIE, Gruppamentu d'Interessu Economicu, Corsica Amandule, chì adunisce un 95% di a produzione regionale.

Sta cuoperativa hè liata à a cuoperativa Sudu Amandule, unica urganizzazione di produttori in Francia.

Per disgrazia, hè suttumessa troppu sta filera à l'alea climatichi è deve sempre pruvà à diversificà i so sbocchi da u sviluppu di prodotti trasformati (amandule arrustulite è cunfitteria)

A filera biologica hè presente dinù, ripresenta una superficia di 40 ettari certificati è conta circa 8 pruduttori.

c) I frutti di statina (presche, nettarine)

Presche, nettarine, baracucche, bambucconi, uva di tola, mele è chjarasge sò colti d'istatina. U so sboccu maiò hè u cummercializà lucale è di staghjone. In u 2010, a superficia data à a produzione di frutti di statina hè stimata à 450 ettari, sia una produzione di 6000 tunnelate realizzata da 130 pruduttori.

Si nuterà d'altronde chè una trentina di produttori hè adunita in l'AFPEC (associu di i pruduttori di frutti di statina di Corsica).

In quantu à a cumercializzazione, l'annu 2009 fù difficiule cù una calata di i prezzi di un 10%.

U principiu di a staghjò 2010 hè statu bonu, ben chì a statina ùn appia tenutu e so prumesse.

Si pò nutà dinù chì l'evuluzione di i prezzi ùn hè omogenia, presche è nettarine anu cunnisciutu un legeru aumentu dapoi u 2008, invece e baracucche calanu (-13%).

U studiu simetricu di i mercati ci hà permessu di custatà chì a maghjine di l'urtaglia, u percentuale forte di presenza à u bancu di u 2009 cù 89% è 3,79€ u chilò ùn s'hè mantenutu l'anni dopu, calendu à 80% in u 2012 per un prezzu à 3,60€ u chilò.

A calata di i prezzi si spieca da l'affaccata à tempu di nove produzione ben chì i volumi di cumercializzazione sianu presenti è regulari nant'à i banchi.

A filera ripresenta 20M€ di scifra è permetti à a Corsica d'esse autubastante per unipochi periudi, in particolare lugliu è aostu.

d) L'urtaglia

In u 2010, e superficie dedicate à l'urtaglia eranu di 340 ettari per una superficie sviluppata à 791 ettari, a produzione urtulana era stimata à 20000 t. à l'annu.

Sta filera ricca da e so varietà d'urtaglia (ligumi à casce, cumprese insalate, biette, spinaccia, petrusellu, sellaru, i legumi à radichi cù e carotte, navoni, porri, cipolle è dinù i legumi frutti pumate, miloni, zucchette, cuccumeri, melenzane, peveroni, fravule, patecche...) hè una filera d'avvene per u mondu agriculu. In a mente cumuna, l'urtaglia sviluppa a simbolica di u produttu esciutu da a terra è fattu da u nostru ambiu.

In quantu à a cumercializzazione, a dumanda di prodotti di l'urtaglia hè firmata calma assai cù un piccu di cunsumu d'istatina chì vene per una parte da una forte attività turistica lucale.

Per disgrazia, a crescita impurtante di u percentuale di presenza à u bancu cunnisciutu in 2009, più di 60% cù un prezzu mediu di 2,20€ u chilò, ùn s'hè mantenuta in u 2011, trafilendu à 48% cù un prezzu à u bancu di 2,13€ u chilò.

U strutturà di a filera è l'usservatoriu di i prezzi messu in piazza da a Camara Regionale anu permessu di fà, toccu u mese di settembre, un bilanciù di campagna di a statina.

U principiu di a staghjò hè sfavurevule assai à a cunsumazione, per caghjò di *Escheria Coli* d'aprile è di cundizione meteò gattive chì anu toccu assai assai e vendite. In media, i prezzi di vendita à u cunsumadore sò calati di un 4% pè raportu à u 2010.

Sé i volumi prodotti in Corsica sò stati in accordiu cù a dumanda è presenti è bè nant'à i banchi, pare chì, paragnatu à a statina, s'hè densificatu u volume di cumercializzazione.

Altru vettore d'una dinamica di a filera, l'urtaglia biologica chì hè caratterizzata da piccule splutazione (da 1 à 4 e), chì producenu una varietà di prodotti tutta l'annata.

U tippu di cumercializzazione u più spartu per l'urtaglia biologica in vendita diretta ferma a vendita nant'à i mercati, e vendite nant'à u pricoghju è dinù e sporte di tippu AMAP (Associu per u Mantenimentu di una Agricoltura Paisana).

Si contanu cusì in u 2012, 430 ettari di superficie splutate in campu apertu è 29 ettari sottu agrottu, u so valore hè stimatu à 15 milioni Euri sia à pena più di 9% di u produttu agriculu corsu.

Si nuterà chì u volume di produzione hè calatu assai assai, partendu da 20000t in u 2010 per ghjunghje à 14300t.

Una calata di i volumi di produzione chì si spieca da una filera in difficoltà in particolare per causa di a cuncurenza di i prodotti à costu debule. Eppure a filera s'hè sviluppata st'ultimi anni cù 500 ettari sfruttati da 70 pruduttori è una sciffra di circa 18M€.

e) A filera di a chivicultura

Ripresenta vicinu à 600 ettari d'arburetu chè i dui terzi si scrivenu in u quadru di a produzione urganizata.

Più di 75 produttori cummercialiseghjanu vicinu à 5000 tonne à l'annu. U periodu di cummercialisazione v'è di u mese d'ottobre à u mese di dicembre cù un piccu forte di cummercialisazione di nuvembre. A piazza di messa in mercatu di u Sudu Este hè a più impurtante (90%), davant'à Marseglia è Rungis. A spurtera ùn rapresenta chè 1,3% di vendite.

A cultura di u chivù hè in generale, à nant'à u pricoghju, un'attività arburicula complementaria.

A messa in mercatu hè ammaestrata male, moltu più chè e strutture di accantera frigurifiche esistente ùn permettenu micca una gestione curretta di a quantità prodotta.

A produzione reghjunale si scrive in un cuntestu climaticu favorevule assai à a cultura, dui assi priuritarii si palesanu :

- 1) Mette in piazza un segnu di qualità è d'urigine.
- 2) Rinfurzà l'ammaestranza di a produzione è di a so qualità dapoi u pricoghju fin'à u puntu di vendita, cù in complementu a prova di tecniche nove è a messa in piazza di una vigilanza sanitaria.

À tempu, pare necessariu di rinfurzà a furmazione di l'attori di a filera, u studiu di i mercati cum'è l'adattamento è a mudernisazione di l'arnesi di produzione.

f) L'oleicoltura

L'alivetu hè statu valutatu in u 2011 à 2000 ettari per cercu 470 sfruttadori chì anu produutu guasi à 430 tonne d'alive. E superficie dichjarate in Appellazione d'Origine Cuntrullata (AOC) sò state di 462 ettari in produzione à nant'à 548 piantate. In regione, 19 mulini anu dichjaratu a so apertura per a campagna 2010/2011.

Cù un Urganisimu di Difesa è di Gestione « Oliu di Corsica » digià custituitu, a filera uleicula s'hè dutata di una interprofessione reghjunale, di marzu di u 2009, à l'ingiru di u Sindicatu Interprofessionale Di l'Oleicultori di Corsica (SIDOC). U sindicatu interprofessionale hè custituitu dinù da l'associu di i produttori (APOC) è l'associu di quelli chì mettenu in mercatu.

Si misura a produzione, per u 2011, à 380 tonne d'alive cumpresu 66 tonne d'oliu AOC/AOP. Si pò acertà chì e raccolte anu patutu assai e cundizione meteurologiche sfavurevule, hè cusì ch'ellu ci vole à capì a dumanda di calamità agricula depositeata in u 2010/2011.

Ùn si pò parlà uleicoltura senza ammintà, a filera biologica, chì si ferma una attività secondaria à nant'à u pricoghju, di regula associata à l'alevu o l'arburicoltura. Eppuru, sta filera hà cunnisciutu un sviluppu impurtante impurtante per via di a rimessa in statu di i duminii esistenti.

A Corsica hè in autosufficienza per ciò chì tocca à l'oliu d'alivu. Per ùn andà à a so perdita, sta filera deve truvà à tutti patti mercati for'di l'isula, chì u mercatu internu hè colmu colmu.

g) A Castaneicoltura

Hè una filera in difficoltà, per via di a malattia chì si rode i castagni cù u « cynips ». Per disgrazia, fin'à avà nisuna soluzione medicale ùn hè pussibile. Eppuru a castaneicoltura ripresenta una sciffra vicinu à 3 milioni d'eurò. In l'avvene, sta filera hà bisognu soprattutto di passà à un sistema di piantazione è micca di rinnuvazione.

Tutte ste speculazione sò state studiate è qualificate da ottene u calculu è l'assu di sviluppu i più ghjusti. S'omu vole avanzà in u quadru di una produzione mediana, ma ferma, pensata à long'andà cù pricoghji poliattivi, hè di primura d'orientà a nostra riflessione ver'di prodotti di qualità in capacità di riceve labeli è certificati.

À l'accorta, l'analisi palisata deve purtà, in a maiò parte, à qualificà è à megliu strutturà tecnicamente e nostre filere, à mubilizà soluzione incitative innuvante, soprattutto in quant'à l'istallazione da chì l'agricultura nostra si possi determinà à nant'à i mercati europei è sceglie pricoghji mediani ma cù valore aghjuntu da esse ricunisciuti è dunque di prusperà.

h) L'acquacultura

L'acquacultura isulana ripresenta un settore cuntrastatu cù 2 filere :

- a filera di a cultura di i mulluschi conta 3 intraprese chì producenu muscoli è ostrice, soprattuttu in cor'di u stagnu di Diana, è in piaghja orientale, precisendu bè chì a Corsica hè a terza regione produttrice di pesci adulti, esciuti da l'alevu marinu daret'à u nordu di u *Pas-de-Calais* è a Pruvenza Costa d'Azuru ;
- a produzione piscicula marina avvicina i 1200 t per una sciffra di 8,4 M €.

Stu settore ùn scontra micca difficultà maiò fora di una prublematica specifica assai quella di u bisognu di manu d'opera qualificata.

A cultura di i mulluschi produce ella 545 tonne di cunchiglie, 478 tonne di muscoli è 67 tonne d'ostrice per un sciffra di 1,4M€.

Per disgrazia, dapoi parechji anni, tutte l'epidemie chì toccanu l'ostrice, ch'ellu sia *l'herpès vomer* o variante di virus, sò identificate cum'è sendu a principale causa di ste perdite.

I metudi di ricerca da luttà contr'à i virus sò di selezziunà ostrice resistente à u virus da studià u so livellu di resistenza à e batterie è di caccia ne un potenziale antivirus.

Tutte ste malatie sò a causa di una calata di a produzione passendu da 300 tonne d'ostrice in u 2007 à 60 tonne oghje chè oghje.

Sta filera aldilà di ste difficultà si salva quantunque per via di un ingiru favurevule à u sviluppu di ste spezie.

i) A filera PPAM (Piante à Perfumu Arumaticu è Medicinale) :

A filera PPAM face parte oghje di e filere strutturante di l'agricultura isulana. In tornu à un interlocutore, u sindicatu Corsica PPAM, vede nasce parechji prughjetti. Sta filera chì a pianta di basa hè a murella cù u so oliu essenziale vede sviluppà si per ogni purtore di prughjettu un attelu di distillazione. Hè ancu una dumanda di a professione sapendu bè chì l'alambicchi dumandanu una maestranza tecnica da garantisce a qualità di u produktu cum'è a securità di u produttore. Dapoi u 2008, ci hè ancu a messa in piazza di un quadernu di distillazione chì i prufessiunali s'ammaestranu da permette di stabilisce è di garantisce un seguitu da u campu à a buttiglia. Dinù i prufessiunali si sò dichjarati di manera chjara in favore di una futura IGP cù soprattuttu a

realizzazione di un quadernu di e culture. Oghje, cum'è per parechje filere, u sindicatu di produttori hà vultu chì l'IGP sia prumossa è messa in davanti cum'è segnu di qualità è d'origine per l'oliu essenziale di murella. Per avà è soprattutto à nant' à u dipartimentu di a Corsica Suttana, si conta 6 aghje di culture cunsacrendu a murella, a vervena, u rosumarinu, a lavanda, a sanghjuvannina, u saffranu. U quadernu di e carighe « IGP Oliu Essenziale Murella di Corsica » hè accumpagnatu da i produttori soprattutto in a realizzazione di u prughjettu di u futuru Urganisimu di Gestione.

Hè quantunque primurosus di precisà chì segundu a voluntà di a filera hè certificata agricultura biologica. A qualità specifica di l'oli essenziali corsi interessa u mercatu di l'aromaterapia è l'industrie cusmetiche. Cusì in u 2011, omu hà ricensatu vicinu à 107 ettari di PPAM cultivate soprattutto a murella. Si conta oghje 23 dumini agriculi in Corsica chì 13 sò in Corsica Suprana. Si misura a produzione reghjunale d'oli essenziali à 1300k.

A produzione d'idrolà custituita di 80% di murella hè stimata à 18.500 litri à l'annu. U valore di a produzione hè stimatu ellu à 1.100.000€.

Puru s'è a murella hè u fiore di a filera, ùn si pò micca mette da cantu u rosumarinu è a mortula chì anu una piazza maiò in a filera, tantu bè chì u sviluppu cummerciale di l'altri oli essenziali di a gamma hè un scopu forte di i produttori. Hè per ciò chì una certificazione hè ammintata per d'altri oli essenziali, un argumentariu cummerciale à nant' à 13 piante aromatiche hè per nasce cù in fine una pruspezzione di mercati novi prevista à mez'andà.

II.3. FILERA BIULOGICA

In cullaburazione stretta cù u CIVAM Bio Corsica, u mondu agriculu sustene u dinamisimu di l'agricultura biulogica in Corsica, e cunversione da l'agricultura tradiziunale à l'agricultura biulogica, u svilippu di l'AMAP è di a marca cullettiva Terra Bio Corsica.

À u tutale, per u periodu 2000-2006, i finanziamenti cunsacrati à a filera biulogica ghjunghjenu à 482 650€ più 397 252€ di u pianu di rialzu. À nant'à stu periodu, e superficie certificate in bio sò cresciute di 174%. Oghje, si conta 250 pricoghji. U scopu di 6% d'aghje agricole in agricultura biulogica hè statu rializatu.

I scopi per a prossima prugrammazione sò :

- Incuragì u svilippu di superficie nove labelizate Agricultura Biulogica ;
- Rinfurzà u svilippu di precoghji certificati Agricultura Biulogica ;
- Aduprà l'agricultura biulogica cum'è un vettore d'innuvazione blubale ;
- Cuntuuà a strutturazione di l'offre ;
- Crescita di a pulitica cummerciale è di a ricerca di partenariati novi.

L'agricultura isulana intervene in parechji campi d'intervenzione, i prublemi permanenti scontri da u mondu agriculu sò :

- ✧ u fundiaru ;
- ✧ l'accessu à i finanziamenti ;
- ✧ a cummercialisazione.

II.4. FILERA LEGNU

A furesta occupa 46% di u territoriu isulanu, sia 402.000 ettari.

U percentuale di terre abbuscate in Corsica Suttana hè di 56% induve a furesta occupa 224.577 ettari, contra 38% in Corsica Suprana cù 177.239 ettari.

A pruprietà di a furesta hè in maiò parte privata.

Hè cumposta soprattuttu di frunduti : leccia per u più (40%), albitru (14%), suari (8%) è castagni (7%).

I coniferi (17%) sò ripresentati da u pinu maritimu è laricciu.

A machja hè una furmazione vegetale tippica di a Corsica, copre una superficia di 105.829 ettari.

Cumposta soprattuttu di frunduti (102.215 ettari), ripresenta 98.059 ettari di furesta privata.

A machja corsa cunnosce un cambiamentu sicuru soprattuttu liatu à l'abandonu di e terre chì face cresce a superficia abbuscata tutale di a regione.

A so evoluzione in furesta hè à le volte piantata da u focu.

Hè certa chì ùn si pò spicà a furesta di a filera legnu.

Ripresenta 21 milione di m³ di frunduti è 15 M di m³ di coniferi.

A produzione annuali hè valutata à 557.800 m³ di frunduti è 375.500 m³ di coniferi.

I coniferi è u faiu facenu parte soprattuttu di a furesta territoriale o comunale, i frunduti di a furesta privata.

A filera legnu di a regione hè cumposta di 17 intraprese cù 8 furestiere, 5 sigherie è 4 mischie. Producenu 24.000 m³ di legnu tondulu, 2600 m³ in legnu d'industria è 4600 m³ in legna da scaldà.

U settore di a custruzione, armatura è casseru, custituisce cù a legna da scaldà, a principale destinazione di u mercatu isulanu di a prima trasfurmazione.

A guasi assenza di un reale settore di a seconda trasfurmazione (legnameria) face ch'ellu ripresenta

un sbocco commerciale debule assai.

Si pò accertà dinù chì a produzione di suaru, spurtata soprattutto in Sardegna, hè stimata à 357.000 m³, esciuta in maiò parte di a furesta privata.

Stu parcu hè cumpostu di 2.300.000 arburi sia 43% di l'effettivi.

L'agricultura isulana intervene in parechji campi d'intervenzione, i prublemi permanenti scontri da u mondu agriculu si fermanu : u fundiaru, l'accessu à i finanziamenti è à a commercialisazione.

III- E PRUBLEMATICHE TRASVERSALE

III.1. U FUNDIARIU AGRICULU

Si pò misurà à traversu a nostra riflessione quantu l'aspettu fundiaru di a prublematica agricula hè frasturnante.

Ci pare dunque necessariu di sottulineà quantu l'avanzata di l'urbanisazione è l'appropriazione di e terre agricole da i citadini per i so passatempì hè forse unu di i fattori i più disturbante per l'avvene di l'agricultura.

Ghjè dunque per apprudindì u nostru studiu à nant'à a quistione fundiaria ch'ellu ci pare impurtante di purtà elementi pertinenti da risponde à a quistione ch'omu si pone à nant'à u mantene di una attività agricula. Puru s'è a vulintà pulitica vè ver'di un mantene di una agricultura efficace in paese nostru, ci vulerà à cunservà i mezi soprattuttu fundiari.

U sughjettu di l'immobiliariu esce in prima pagina di i media ogni ghjornu : mancanza d'alloghji suciali, crisa di l'alloghju, produzione di fundiaru pocu è micca, parcu immobiliariu malsanu, dumanda di decuncentrazione urbana, ecc... Cù una cunsequenza principale : a vulintà di truvà fundiaru chì l'urbanisti chjamanu « vergine » è à bon'pattu, vale à dì terre agricole.

A sfida principale di u nostru mudellu agriculu serà d'ammaestrà u fundiaru è d'anticipà i bisogni agriculi di dumane sviluppendu di modu forte e produzione identitarie franchendusi situazione di dipendenza. Òn si pò di sicuru avvicinà sta tematica senza realizà prima un bilanciu di e cuezzione fundiarie isulane.

Durante e nostre audizione, tutti l'usservadori, cumpresu i più avvezzi è specialisti anu tutti palisatu a mancanza di pulitica fundiaria. Hè certa chì u fundiaru hè spezzatu, in l'indivisu, induve a difficoltà di truvà i tutuli di pruprietà hè chjara cù una grande parte di l'indivisione successorale regulata micca. Hè per ciò chì arregulà e successione, custituisce i tituli di pruprietà in Corsica, hè indispensevule.

Hè dinù un mercatu strettu è speculativu cù un $\frac{3}{4}$ di e vendite chì portanu à nant'à terreni inferiori à un ettaru ciò chì pone un prublemu seriu per a strutturazione di i pricoghji agriculi. Sti pricoghji di menu di unu ettaru dumandanu una valurizzazione di u prezzu di vendita è escenu cusì di u quadru di l'ecunomia agricula.

Di modu cuncretu, hè statu custattatu toccu u 2003 una crescita di i prezzu di u fundiaru in prugressione di più di 125% trà u 2003 è u 2008 sia una crescita di più di 20% di i prezzu di e terre agricole in media à l'annu da un annu à l'altu. Bisognu à precisà chì u mercatu speculativu si situeghja in i lochi litoral è periurbani induve si trova terre agricole bunissime.

Sta maestranza fundiaria difficiule hè causata soprattuttu da un ritardu strutturale è strutturante in a piannificazione di e terre. Di fatti, per avà, U PADDUC hè in corsu d'elaborazione è ùn ci hè micca Schema di Cuerenza Territoriale è pocu PLU ch'è assai sò in discussione. Sta mancanza di riferenza à i documenti d'urbanisimu regulamentari, acranca u sistema è intretratene l'illusione, moltu più ch'è a pressone fundiaria inghjennata da l'urbanisazione è u turisimu hè chjara è ch'è a cuncurenza trà e terre agricole è e terre d'urbanisazione hè di più in più impurtante. In 10 anni, u prezzu medianu à l'ettare hè cresciutu di più di 300 %.

Cum'è u panurama di l'agricultura isulana à ci hà palisatu, a Corsica hè spargugliata di picculi pricoghji, pocu strutturati è valurizati cù un vulume debule assai di produzione.

In stu casu precisu, a nostra produzione agricola puderebbe s'è u casu si presenta, benefizià di u turisimu sviluppendu un agriturisimu ammaestratu, cumplementu di l'attività principale senza caccià ne u sensu prufondu. À stu titulu sviluppendu i circuiti corti di cummercialisazione cù a tavola d'ospite o l'usteria campagnola, merita stu vettore d'esse sustenutu di più, patti è cundizione ch'ellu sia arregulatu.

Cunvene dinù di piglià in contu a fiscalità fundiaria adatta pocu è micca è ch'è ùn porta micca a ghjuventù ver'di l'istallazione, u sminu di e tasse fundiarie i primi cinqu'anni cum'è tanti puntelli à l'attività.

À long'andà, l'avvene purtroppu assughjettivu di i pricoghji tandu hè cumprumessu, palisendu di modu chajru a difficoltà di a trasmissione è u rinnovu di i pricoghji.

U statu di i lochi à livellu fundiaru, una volta realizatu, dumanda oramai varie misure ch'è anu da pruvà à prutege e terre agricole.

L'inseme di i nostri interlocutori è tutti i membri di a cummissione anu analisatu a situazione di tale modu ch'è a messa in piazza di un osservatoriu fundiaru custituitu da a Cullettività Territoriale di Corsica, l'ODARC è a SAFER, sia a prima pietra à l'edifiziu.

Di fatti, stu osservatoriu averebbe cum'è oghjettu di sensibilizà l'eletti à l'elaborazione di documenti d'urbanisimu, d'usservà l'acquisti, e vendite, i prezzu, e valurizzazione, e situazione è d'esaminà l'evoluzione di i prezzu in certi lochi di pettu à l'altri. Stu usservatoriu hè impurtantissimu, ch'è fora di a funzione d'usservazione, hà da ghjuvà di zircu è di signale per tutte e forme d'abusi.

Serà cumpostu di persunalità, frà altri di sicuru i prufessiunali, ch'è averanu cum'è scopu di sensibilizà e cullettività in ZAP (Zone Agricole Prudette) o à identificà in i documenti d'urbanisimu l'aghje agricole à forte potenzialità.

Una volta di più è per informà di modu largu un publicu pocu avvezzu, cunvene di definisce di modu strettu ciò chì hè una ZAP. L'aghje agricole prutette sò state create da a lege d'orientazione agricola di u 1999 palisendu un territoriu di prutezzione fundaria.

Hè un arnese impurtante d'asestu di u territoriu in termine di prutezzione di u fundiaru agricole puru s'è a ZAP ùn pò garantisce a viabilità o a perennità di l'agricultura.

Secondu u codice rurale, una ZAP ùn vale chè per l'aghje agricole chì a preservazione hè d'interesu generale, sia per via di a qualità di a produzione, sia per via di a situazione geografica. Hè un arristatu prefetturale chì a delimitaghja à nant'à a pruposta o dopu l'accunsentu di u Cunsigliu Municipale o d'ogni stabilimentu publicu cumpetente in quant'à u PLU.

Eppuru, bisognu ci hè à acertà chì ogni mudifica o adatazzione di a terra di una ZAP hà da esse sottumessa à l'avisu di 2 urganisimi, a Camera d'agricultura è a CTOA.

I studii realizzati anu mustratu chì a classifica di una terra in ZAP hà cum'è effettu di sminuà u prezzu di u fundiaru agriculu è dunque di fatti di facilità l'istallazione di i ghjovani agricoltori in corsu di istallazione. Sta calata di u prezzu si spieca da u fattu chì a terra classificata in ZAP, ùn sendu più per custruisce, esce di u sistema di speculazione o di crescita di u prezzu di u fundiaru agriculu.

Da assicurà a totale chjarezza di u fundiaru agriculu, hè necessariu di cumunicà megliu à nant'à u georiferimentu di i precoghji stabiliti da l'ODARC.

Una basa di dati generali à nant'à a potenzialità di e terre hè necessaria soprattuttu in quant'à l'elaburà di i regulamenti di e zone di i PLU.

A messa in piazza di un fondu fundiaru pare una soluzione adatta per fà riserva fundiaria. Cumpostu di modu tripartite da a CTC, L'ODARC è a SAFER averia cum'è scopu d'acquistà un bè quand'ellu hè in vendita privata o riservata da pudè lu tene dopu.

In quant'à l'asestu fundiaru, a necessità di mette in piazza una animazione fundiaria à territoriu pare imperiosa.

Stu tippu di dimarchja averebbe da cuntribuisce à facilità i scambii, scuntrà i pruprietari è permette à l'agricoltori d'ammaestrà megliu stu fundiaru. Ogni dimarchja d'asestu fundiaru per strutturà i pricoghji deve esse incuragita.

Hè cusì chì i scambii, l'aggruppà di i terreni, e terre incolte sò arnesi chì devenu esse mubilisati da liberà stu fundiaru per fundà novi pricoghji.

Un pianu per una dinamica di u fundiaru deve esse messu in piazza di modu à :

- Prevede mecanisimi fiscali è finanziari di rimpattu ;
- Mantene u sviluppu di e superficie ;
- Rimette in cultura e superficie à l'abandonu, soprattu à nant'à a costa orientale chì hè a più maiò di Corsica à prò di l'agricultura innacquata in totalità ;
- Rimette in valore e culture esistente è mubilizà i pruprietari ;
- Sviluppà e cuoperative per u fenu.

Tuttu stu travagliu ùn puderia esse pussibile senza a messa in cuerenza di i diversi operatori fundiari esistente è à vene cum'è a SAFER, u Cunservatoriu di u Litorale è u EPF (Stabulimentu Publicu Fundiaru).

a) A SAFER(Sucetà d'Assestu Fundiaru è di Stabulimentu Rurale)

U primu operatore fundiaru à intervene hè a SAFER, sucetà anonima, chì u guvernà hè datu à un cunsigliu d'amministrazione, cumpostu di e camare d'agricultura, di i sindacati agriculi, di a CTC è di i Cunsigli Generali.

E so principale missione cussistenu, in mezu rurale è periurbanu, à priservà i spazii naturali, agriculi è furestieri è dinù à accumulà u sviluppu economicu di i territorii.

A SAFER cù un bugettu annuale di 760 000€ hà pocu mezi finanziari per assicurà e so missione di serviziu publicu in quant'à a prutezione di i spazii, naturali è l'accompagnamentu economicu.

Da chì a SAFER riempi e so missione di serviziu publicu hà da esse dutata di mezi finanziari necessari per risponde à i scopi definiti da a CTC. Bisognu à quantificà li da ch'elli sianu in adeguazione cù e prestazione di basa in u quadru di a so missione di serviziu publicu.

Una altra risolsa pussibile per rinforzà i mezi finanziari pò esse u prelievu di una parte di a tassa specifica d'ecchippamentu rilevata à prò di a SAFER.

Per assicurà e so missione, dispone di mezi regulamentari cum'è u drittu di prima compra (subitu di Om2 in e cumune cù un POS o un PLU, è à partesi di 1000m2 in l'altre zone, appiecazione di l'alinea 2 di u decretu di u 19/02/2010 di l'articulu 1143-1 di u Codice Rurale), ma ogni ghjornu stu drittu santissimu è sacratu hè francatu, soprattuttu cù a classifica di e terre in superficie abbuscate, assestu di spazi industriali o d'estrazione minerale ciò chì blocca u drittu di prima compra è di nuda pruprietà.

In quant'à à a nuda pruprietà, bisognu à sapè chì in drittu francese, a piena pruprietà hè cumposta di a nuda pruprietà (u fundiaru) è l'usufruttu, u vizio ghjuridicu vene da u fattu chì u drittu auturiseghja di spicà a nuda pruprietà (u fundiaru) di u so usu, ciò chì impedisce u drittu di prima compra per l'utilisazione di a terra.

U prublema scontru di modu regolare hè l'impussibilità per a SAFER di riservà in cor'di spazii o terreni destinati à l'assestu industriale à u scavà minerale. A maiò parte di sti prughjetti sò in lochi agriculi chì tandu sò classificati in spaziu à scopu industriale. A destinazione di sti prughjetti hè ricensata cum'è centri da interrà a rumenzula dumentica. Parechje persone sò d'accunsentu per di chì oghje e terre nostre meritanu d'esse prutette di megliu di pettu à stu tippu di classifica abusivu utilizatu cù falsi mutivi è chì ùn devebbe micca esiste in Corsica.

È megliu, in una isula cum'è a Corsica, di pettu à a so natura, stu tippu di prughjettu ùn devebbe mancu nasce.

Prughjettu, da precisà, chì deve esse realizatu à 3 anni, o a SAFER, ancu di grazia, pò ripiglià i so dritti di prima compra s'ella vole.

Si ghjunghje quì à i limiti di u codice rurale è omu si rende contu di modu chjaru chì certi spazii sò « prutetti » da dispusizione regulamentarie chì piglianu a suprana à nant'à e nostre terre agricole.

Di sicuru, hè impensevule chì terre agricole sianu rilegate in spaziu industriale sott'à a scusa di l'interessu dettu cullettivu.

Cumu avvicinà u fundiaru agriculu senza avè un veru studiu in quant'à l'evoluzione di u prezzu di e terre agricole. Stu sguardu largu ci hà da permette d'avvicinà a realtà di a situazione.

VALORE APPARAGUNATU DI E TERRE AGRICOLE IN CORSICA

<i>Natura di e terre / Annate</i>	<i>2010</i>	<i>2003</i>	<i>Coefficiente d'Evoluzione</i>
Terra da sulcà (media pisata)	4.383 €/ha	2.993 €/ha	1.46
Pianura (media pisata)	4.875 €/ha	1.940 €/ha	2.51
Machja (media pisata)	1.436 €/ha	750 €/ha	1.96

L'indicatori di i prezzi sò quì prezzi duminanti, fruttu di a tarificazione à più currente à nant' à u territoriu.

Sta crescita di i prezzi si spiega in particolare cù a scarsità di e terre è di i prughetti di vendita chì facenu alzà i prezzi. A Corsica pate un effet speculativu chajru dapoi una decina d'anni è omu sà chì a terra hè oggettu di ambizione forte. Stu fenomenu hè cresciutu da una urbanisazione di più in più forte, appicciata à u turisimu, da fà nasce numerosi appetitti.

È puru sta crescita hè da relativisà, i prezzi traducenu dinù una evoluzione nurmale di u fundiaru agriculu, second' à a SAFER. Un impurtante travagliu d'usservazione fundiaria deverà esse realizatu da armunizà è regulà i prezzi di e terre agricole da permette à quelli chì portanu un prughjettu agriculu d'avè ci accessu. A rivalurizzazione di u mondu rurale passa per una pulitica vuluntarista, in quant' à i prezzi di e terre agricole da prutegge lu di una crescita tremenda, ostaculu maiò u so accessu.

Serebbe dinù una bona d'allergà a governanza di a SAFER aprendu u cunsigliu d'amministrazione à 2 membri novi o mancu, à prò di a CTC, da impegnà per u megliu i nostri eletti in e scelte per l'avvene.

Elaburà una convenzione trà a SAFER è a CTC ci pare imperiosu soprattutto di pettu à i scopi di :

- Definisce l'azione à prumove è securizà l'operazione fundiarie soprattuttu quelle in leia cù u drittu di priurità ;
- Mette in piazza un osservatoriu fundiaru reghjunale destinatu à cunnosce l'evoluzione di u prezzu di e terre è a cunsumazione di i spazii. St'arnese hà da permette d'anticipà di megliu à nant' à l'azione pubbliche da prumove ;
- Mette in piazza un fondu fundiaru reghjunale è rurale da creà riserve fundiarie è dinù accumpagnà u sviluppu lucale di e cullettività, anticipà compre per assesti futuri, aspettà i finanziamenti di i benefiziari SAFER.

S'è parlatu assai tant'anni fà di l'adattabilità di e lege naziunale à a Corsica chì l'isula conta pur'troppu specificità. S'ellu ci hè da veru un duminiu da adattà à e nostre specificità hè quellu di u codice rurale.

Francà si di u drittu di prima compra hè frequente assai è risicughja torna di cresce. Per ciò, certe dispusizione di u codice rurale devenu esse mudificate è adatte à e specificità lucale, soprattuttu in quant' à e superficie abbuscate, u smembrà di pruprietà, e carriere, e cessione di parte.

A sola è unica soluzione pussibile à stu ghjornu hè in l'adattabilità di u Codice Rurale, ci hè da sperà chì a CTC utiliseghjì i puteri dati da a lege di u 22 di ghjennaghju di u 2002 in quant' à i regulamenti da chì una deliberazione permettì d'ùn francà più u drittu di prima compra.

Chì a CTC appia u putere di produce regulamenti per ghjuvà si ne di modu chjaru da prutege u fundiaru ùn hè micca impussibile.

Moltu più chì a sapemu, a lege di u 22 di ghjennaghju di u 2002 dà putere chjaru à l'assemblea di Corsica.

Di fatti, prevede ch'è l'iniziativa di l'Assemblea di Corsica o à a dumanda di l'Esecutivu, l'Assemblea di Corsica possi presentà pruposte da mudificà o adattà dispusizione leghjislative o regulamentarie in corsu o in elaborazione in quant'è e cumpetenze, l'organisationsone è u funziunamentu di l'inseme di e cullettività territoriale di Corsica, cum'è per ogni dispusizione regulamentaria è leghjislativa in quant'è u sviluppu ecconomicu, suciale è culturale di a Corsica.

U putere regulamentariu di a CTC s'appiega in u quadru di e cumpetenze date da a lege.

In u campu di e cumpetenze date à a CTC, esiste u documentu di riferenza di l'isula chì s'imponerà à tutti in termine d'urbanisimu è di pianificazione di e terre, u PADDUC.

U PADDUC (Plan d'Aménagement et de Développement Durable de la Corse), sendu classificatu cum'è documentu superiore, cunvene di fà pruposte chjare da prutege e terre agricole. U PADDUC averà da prevede una dispusizione regulamentaria da difende ogni forma di classifica di e terre agricole in spaziu à missione industriale.

Prupunimu à stu titulu chì un drittu di prima compra possi esse accurdatu à e cullettività cum'è à e camere cunsularie, à livellu di e terre agricole, in quant'è i spazii à vucazione industriale o nuda pruprietà è u so smembrà.

Hè necessariu à tutti patti per priservà e nostre terre, sta leia fertile chì ci tene, d'appiegà u drittu di prima compra per u contu di e cullettività in u quadru di prughjetti d'assesti rurali.

b) U cunservatoriu di u spaziu liturale è di liti lacustri

U cunservatoriu di u spaziu liturale è di i liti lacustri, altru stabulimentu publicu amministrativu, cuntribuisce à a prutezzione di e terre agricole.

Da una parte, a so istanza deliberativa hè u cunsigliu d'amministrazione naziunale, cumpostu per metà d'eletti è per metà di persone qualificate. Di l'altra parte, a so istanza cunsultativa hè u cunsigliu di i liti cumpostu di 12 eletti è di i ripresentanti di u Statu.

E so missione sò identificate di modu chjaru cum'è a prutezzione definitiva di spazii naturali è di paisaghji à nant'è i liti maritimi è lacustri è a difesa di ogni spaziu naturale, da accertà in zone liturale.

U so solu è unicu mezu d'azzione hè palisatu à traversu u drittu di prima compra, solu per delegazione à nant' à terreni classificati in spazii naturali sensibile.

I so mezi finanziari s'articuleghjanu in giru di u drittu annuale di franchizia di i battelli di piacè, drittu chè li permette di dispone di un bugettu annuale di 45M€.

c) L'EPF (U stabulimentu Publicu Fundiariu)

L'EPF hè un stabulimentu publicu à caratteru commerciale è industriale. Custituisce un altru mezu per limità e perdite fundiarie è a speculazione è serà l'arnese di a CTC in quant' à u fundiariu.

A so governanza s'articuleghja in giru à un cunsigliu d'amministrazione cumpostu d'eletti chè a missione serà i studii, l'acquisti fundiari, u purtame, a gestione è a rimessa in statu di terreni per custituisce riserve fundiarie da risponde à i scopi di l'articulu L.300-1 di u codice di l'urbanisimu in quant' à l'alloghji suciali, l'ecchippamenti cullettivi, a salvezza di u patrimoniu...

Eppuru, ci vulerà à tutti patti fà chè nisuna forma di cunflittu d'influenza o d'intoppu ùn intervenghi trà a SAFER è l'EPF, e missione d'ognunu devenu esse definite megliu o definite dinù da ch'elle sianu chjare è capite.

d) L'AFP (L'Associu Fundiariu Pasturecciu)

L'AFP, altru arnese di srutturazione di u spaziu, hè un stabulimentu publicu chè permette di trapassà i prublemi di u spezzà è di l'indivisu di u fundiariu. Stu tippu di struttura, dop' à una cuncertazione cù i pruprietari –quand'elli sò identificati à nant' à un territoriu datu è chè 50% d'elli sò d'accusentu, l'inseme di l'altri sò tenuti di rientre in a logica di l' Associu Fundiariu- pò ottene a maestranza fundiaria à nant' à sta zona è tandu pulitiche di sviluppu ponu esse iniziate.

Hè certa chè hè un arnese cumplessu à mette in opera ma chè permette di mubilizà u fundiariu, d'asestà lu, di mette lu in valore è di stallà un agricoltore.

Hè vera chè in certe cumune cum'è in Guagnu, per un dettu induve ci hè una maestranza fundiaria comunale guasi totale, e messe in valore sò state fatte da u Mere è a cumuna è anu purtatu prughjetti d'investimentu per e piste furestiere, e piste agricole, a rinnuvazione, u castagnetu, l'istallazione di 2 allevatori purcini, ecc...

Bisognu dinù ad avè in capu chè l'associu fundiariu hè un arnese chè pò funziunà di modu perfettu s'ellu hè ammanitu da l'attori lucali in particolare in quant' à a mubilizzazione fundiaria chè ùn hà forse micca valore.

e) I Cunsigli Generali

I cunsigli generali anu cumpetenza in l'asestu fundiariu, in particolare cù a Cummissione Dipartamentale d'Asestu Fundiariu chè gestisce e procedure di e terre incolte è à l'abandonu da mubilizà ste superficie à l'abandonu. Per ciò u statu d'incultura deve esse ricunisciutu prufitendu di fattu à l'agricoltore.

Altru attori maiò, e cumune chì dutate di un documentu d'urbanisimu anu un drittu di prima compra urbanu ch'elle utiliseghjanu pocu è micca.

Ùn si pò chè lodà stu tippu di strutture è d'iniziative amministrative patti è cundizione ch'elle ùn sinau in cunflittu.

Per un dettu, u cunservatoriu di u liturale ùn intervene micca solu à nant'à l'aghje di u liturale ma dinù à nant'à spazii agriculi cù cundizione di sfruttera di stu fundiaru da l'agricultori assai regite.

L'interessu di l'EPF hè di pudè cuntinuà à mez'andà riserve fundiarie in l'aghje periurbane da realizà in particolare alloghji suciali à bon'pattu. L'EPF hè cumpetente à nant'à l'inseme di u territoriu reghjunale è pò dinù acquistà terre agricole.

Da francà si di un imbrogliu regulamentariu è amministrativu, hè vitale di cuurdunà azzione d'operatori fundiari soprattuttu in quant'à a specificità di u campu d'azzione è di favurizà a creazione di un fondu per u fundiaru agriculu, iniziatu da l'ODARC ma gestitu da a SAFER di Corsica.

Da ottene una pulitica fundiaria cuerente è à long'andà, l'inseme di e misure precitate averanu da esse aduttate è adattate.

A messa in piazza di una piatta forma cumuna in cor'di a CTC da aghjunghje attori è operatori permetterà di definisce una strategia fundiaria glubale à partesi da una pruspettiva territoriale. Serà cusì capitale di definisce bè l'urientazione è i scopi da realizà per ogni operatore in funzione di e so cumpetenze.

A pianificazione di l'usu di e terre hè un elementu primurosus d'avvicinera è di capiscitura di a destinazione di e terre. Una pulitica fundiaria ùn si pò allergà è capisce ch'à traversu un identificà chjaru di e zone.

A specificità di a nostra isula hè bella chè demustrata, ci vulerà à ottene l'adattamento di certe lege è regulamenti à e specificità lucale aldilà di una messa in adeguazione di una fiscalità stabulita di modu chjaru (terreni agriculi/terreni da custruisce, urbanu/rurale).

In quant'à e zone di pianura à forte potenzialità agricola, a sfida serà di limità l'effetti di a speculazione. L'arnesi ammintati sopra puderebbenu permette di priservà ste terre.

Omu ùn si pò scurdà di u rollu di a Cumissione Dipartamentale di Cunsumu di i Spazii Agriculi, istituita in a lege di mudernisation agricola di u 2010 per a valutazione è l'usu di e terre agricole. Sta cumissione puru interessante à livellu di i prughjetti presentati (PLU, certificati d'Urbanisimu), permette à i ripresentanti di a professione cum'è à i stituziunali di dà un avisu à nant'à i prughjetti, hè

una prova di chjarezza di presentà documenti d'urbanisimu chì fissanu e regule cum'è una distribuzione di u spaziu da precisà. Peccatu chì l'avisi dati ùn sianu chè consultativi, e comune avendu a scelta di seguità li o micca.

III.2. L'ACCESSU À U FINANZA

Oghje chè oghje, a mancanza di sustegnu di u settore bancariu hè l'ostaculu maiò di l'accessu à i finanziamenti. Inutile di vultà à nant'à i prublemi storichi di l'indebità bancariu è suciale chì custituisce un frenu à u stallà è à u sviluppu di i pricoghji.

Hè inutile dinù di vultà à nant'à a gestione passata di un stabilimentu bancariu, à prò di u mondu agriculu chì i sbagli oghje sò pagati cuntante da a ghjuventà agricola.

Bisognu à custattà ch'à traversu i belli discorsi, a bona voluntà, a fidanza manca. Or, hè ghjust'à puntu sta fidanza chì face leia per u sviluppu di i pricoghji è per un impegnu cumunu à prò di l'avvene.

A sfida di dumane serà di sustene d'investisce per sviluppà i pricoghji. Hè chjara chì un ghjovanu chì principia ùn pò micca avè fundi persunali impurtanti assai per stallà si. Hè à stu mumentu precisu ch'omu pò custattà un cambiamentu di destinazione di DJA (Dotation Jeune Agriculteur).

Sta DJA, chì u scopu hè di procurà à i giovani agricoltori una rendita minima nanz'u ch'elli possinu stantà soli u so pane da a so attività, custituisce a prima cuntribuzione per i stabulimenti bancari da cuntrattà impresti è da pudè investice à nant'à u pricoghju.

L'accessu à i finanziamenti hè una primura maiò di u mondu agriculu.

L'azione ardita serà torna necessaria chì sistemi vulentaristi assai seranu da mette in piazza soprattutto durante u percorsu di stallazione.

L'aiuti europei devenu esse di più diretti, di più vicini à u terrenu per valurizà u patrimoni produttivu identitariu. I finanziamenti facenu parte di l'arnesi da permette di cresce u valore aghjustatu di i pricoghji.

E varie pussibilità di l'impegnu di u *Crédit Agricole* ùn permettenu micca per avà d'avvià a nostra sucetà ver'di u sviluppu à long'andà, l'inseme di i risichi pigliati è i prezzi instabile inghjennanu un spegnà chjaru urdinatu da l'impossibilità à ammaestrà u calindariu di a messa à nant'à u mercatu di i prodotti.

Misure innuvante di più cum'è a bunificazione di i percentuali d'interessi à l'agricultura ghjovana, famigliale è labelizata devenu esse rinfurzate (Grecia), u sviluppu di una banca di sviluppu reghjunale agriculu deve esse messa in davanti (iniziativa di u Sgìu Cummissariu europeu à

l'agricultura, Daxian CIOLOS, per creà 8 banche di sviluppu reghjunale à traversu l'Europa da sustene l'agricultura), u megliurà di a cummunicazione trà e filere, a furmazione di i respunsevule cuoperativi agriculi à i mezi di finanziamentu, accumpagnà e strutture sindacale, eccu l'arnesi da permette ci di truvà crediti novi.

À livellu europeu, l'assi di u FEDER deve esse simplificati. U valurizà di e filere cum'è u megliurà di l'infrastrutture o a furmazione devenu esse facilitati di più, di menu tecnucratichi. E misure parenu troppu alluntanate. A pussibilità per l'organisazione di fà dumande in seme, d'assicurà u muntame di i cartulari per mutualizà i mezi serebbe una bona, un prezzu cunvenutu serebbe cuntatu per u tempu passatu à fà u cartularu.

S'è i sforzi sò sempre da fà per facilità a creazione è u sviluppu di i pricoghji da i giovani agricoltori, u fattu si stà chì misure sò state quantunque messe in piazza per accumpagnà i giovani agricoltori in i so prughjetti.

Cù a creazione di u fondu di garanzia agricola, a CTC è u so offiziu, l'ODARC, anu vultu favurizà l'accessu à u creditu di i giovani agricoltori in fasa di stallazione o di sviluppu è di fatti, purtendu si garante, riduce i risichi pigliati da i stabulimenti di creditu. St'iniziativa per un urganisimu publicu di purtà si cauzione à prò di un prughjettu privatu merita d'esse salutata, hè un simbulu forte d'impegnu di una cullettività chì crede nun solu in a so agricultura ma dinù in a so ghjuventù.

E mudalità tecniche di stu fondu, gestitu da France Active Garantie per via di l'associu France Active, sò urganizate cusì.

I beneficiarii sò ghjovani agricoltori, qualessa sia a forma ghjuridica di u so pricoghju, in fasa di creazione, di ripigliu o di sviluppu.

L'impresti bancarii eleghjevule sò quelli di più di 6 mesi destinati à l'investisce curpurale (bastimentu, fundiaru, materiale, bestiame) è/o bisogni di fondu di funziunamentu.

L'imprestu hè garantitu à 65% per u più è u muntante di l'incorsu garantitu ùn puderà micca andà aldilà di 45 000€. U fondu di 600 000 € à l'annu durante 2 anni hè finanziatu à nant'à u bugettu di l'ODARC, 300 000€ per via di u FEADER è 300 000€ per via di a contraparte CTC.

Puru s'è l'iniziativa hè da salutà, omu si pò lagnà chì una volta di più a Corsica sia in ritardu di pettu à l'altre regione francese.

L'accessu à u fondu di garanzia si ferà senza garanzia d'età è soprattutto serà duttatu di un bugettu più impurtante da apresi à l'in seme di l'agricoltori. A messa in piazza di un fondu di garanzia dedicatu è in accessu à tutti deve permette di sustene è d'accumpagnà i precoghji in e so dimarchje.

Altru dispositivu, l'imprestu d'onore destinatu à i ghjovani agricoltori.

Sti dispositivu hà cum'è scopu di facilità a creazione o u sviluppu, mentre e trè prime annate di a stallazione, di u pricoghju. Permetterà di cumplettà l'arrecu persunale in u quadru di un pianu di finanziamentu, facilitendu cusì l'imprestu bancariu.

In oltre, stu dispositivu novu hà da permette di riduce u montante di l'imprestu bancariu o hà da finanzà u fondu di fuziunamentu per permette à l'agricoltori di mubilizà di modu più faciule l'aiuti.

Hè per via di u CIR (Corse Initiative Réseau), gestiunariu di u fondu, chì l'aiutu à u muntame di i cartulari è l'accumpagnà di i purtori di prughjettu si ferà à nant'à u durà di u rimbursà di u creditu

U gestiunariu di u fondu dispone di un fondu dedicatu chì face l'ogettu di un seguitu staccatu è independante da attribuisce impresti d'onore à chì crea o ripiglia attività. U muntante à massimu di l'imprestu hè di 30 000€ à 0% da rimbursà à nant'à 5 anni ; stu fondu hè duttatu di 400 000 € à l'annu.

D'altronde, una soluzione per esce di u spegnu bancariu serebbe chì a CTC s'impegni cum'è prumutore in una dimarchja di cuncertazione cù l'inseme di e piattaforme bancarie da riflette à l'arnesi finanziari, cum'è l'imprestu di sustituzione per accumpagnà i ghjovani agricoltori ma dinù i prughjetti di mudernisazione.

Mecanisimi devenu esse previsti da permette à i giovani agricoltori di custituisce fondi persunali franchendu si u scambiu di destinazione di l'aiuti, cum'è a DJA è accresce i mecanisimi di garanzia bancaria cum'è dettu prima.

Ste misure d'accumpagnamentu di a nostra ghjuventù sò state inghjennate da i nostri eletti ma dinù di un largu lobbying di l'urganisazione prufessiunale, da aiutà sta ghjuventù chì credi in a so terra.

Ci vulerà dinù in quant'à l'impresti incità di modu più forte a messa in piazza d'impresti di sustituzione o d'impresti di campagna da assiste l'agricoltori in l'investisce è a gestione di a tesureria soia.

L'imprestu di sustituzione hà u vantaghju di securizà l'agricoltori cù un avanzu di tesureria da permette di realizà i so prughjetti, u tempu di percepì a suvenzione.

A banca deve esse dinù presente à cant'à l'agricoltori da securizà li, da accumpagnà li in a mudernisazione di i so pricoghji, per avè una produttività megliurata.

Hè oramai una banca privata libera di e so scelte ma forse serebbe megliu di prupone a creazione d'un associu di banca corsa da creà un locu di scambiu, di cuncertazione è di pruspezzione cù u mondu agriculu, da truvà soluzione, ciò in u scopu di fà leia è di risturà a fidanza.

Per ciò, a presenza di i professionisti hè indispensevule.

S'è a ghjuventù hè un elementu impurtante di l'agricultura, omu deve dinù pensà à l'anziani. Da chì un pricoghju possi campà, hà bisognu d'investisce per sviluppà si è dunque hà bisognu di finanziamenti. Ben'chì arnesi sianu messi in piazza per i giovani, ùn scioglienu micca u prublema di l'anzianu.

Eppuru hè certa chì s'è st'arnesi funzionanu, seranu una prumessa d'avvene è permetteranu d'andà più in là in u quadru di a prossima prugrammazione.

L'anziani anu prublemi tremendi in l'accessu à i crediti, ùn si pò micca caccia li fora o lascia li per strada. A nostra riflessione deve ghjuvà di portabandera di una generalisazione di l'arnesi di finanziamenti per tutti l'agricultori, anziani è ghjovani, uniti in u durà di i pricoghji.

Aldilà di i sforzi di mudernisazione è di finanziamenti in quant'à à l'investisce di pettu à l'ODARC, serebbe di primura chì l'anziani possinu avè accessu à u finanziamentu di u materiale.

Sta visione pò esse caricaturale eppuru i criteri d'accessu per l'anziani in funzione di e filere sò troppu restrittivi, unu di i scopi serà a rimessa à livellu di tutt'ugnumu cù regule cumune è ghjuste.

In u quadru sempre di un accumpagnà di l'agricultori in l'accessu à l'imprestu bancariu, serebbe una bona chì l'organismi agriculi indettinu persone avvezze à e pratiche finanziarie, una spezia di cunsiglieru agriculu finanziariu, in cor'di e camare, filera o altre chì accumpagnerebbe l'agricultori in e so dimarchje è neguzierebbe ind'è i partenari bancari.

III.3. A PRODUZIONE

U mudellu produttivu hè soprattuttu una prova di viabilità è di sparghjera. Puderiamu ripete è ripete ma ùn hè chè producendu a qualità ch'ellu s'hà da megliurà a cumpettività di i prodotti lucali.

L'interessu di i segni di qualità si trova in l'ottenzione di un produttu chjaru, labelizatu, autenticatu, signalatu chì sia a vetrina, u spechju di un territoriu. U segnu di qualità hè u risultatu di un travagliu longu chì porta a garanzia à u produttore di a ricunniscenza di u so sapè fà, è a garanzia à u cunsumadore di una urigine è di una qualità.

Per un dettu, l'interessi di una dimarchja AOP si sbucinanu di tal' modu chì stu labelu appicighi à l'urigine di produzione a materia prima ; custituisce un ostaculu à l'impurtazione, partecipeghja à a valorisazione di a Corsica è di i so territorii, difende nomi è sapè fà lucali. Porta un valore aghjustatu à u produttu è cumporta un interessu suciale, ecunomicu è rilaziunale.

Solu incunveniente à sta situazione guasgi perfetta, l'insularità chì pesa à nant'à u costu di ciò chì entre per via di u costu di u trasportu.

Per limità u costu di ciò chì entre, omu deve utilizà i mezi dati da u schema pastorale, da mette in valore una filera alimentazione di u bestiame è esse dipendente di menu da altri attori.

A strutturazione di i pricoghji è a messa in piazza di una cellula alimentazione di u bestiame custituisce una risposta à a limitazione di i costu.

A salvezza di u sistema passa per u sviluppu di e produzione lucale.

A diversificazione di i pricoghji si deve fà di modu misuratu. L'ottenzione di segni di qualità hè una di e garanzie per valorizà e produzione lucale è guadagnà parte di mercatu. Hè dinù un mezu di rassicurà i cunsumadori chì anu da preferisce in priorità a qualità, a produzione lucale à a l'industria di massa.

Eppuru ùn si ponu oppone tutt'à fattu chì l'accessu à sti prodotti dipende dinù di e finanze d'ognunu.

S'ellu pare chjaru chjaru chì a ricerca di segni di qualità custituisce una via di salvezza per u nostru mudellu agriculu, ùn ci vole micca quantunque à frangaglià u costu. Chì e nostre produzione possinu guadagnà parte di mercatu à u fora ùn custituisce manc'à pena un osstaculu à un accessu à ste materie per a clientela lucale. L'epica induve campemu è u cuntestu attuale di crisa ùn permettenu micca per disgrazia à certe famiglie isulane di cumprà ste produzione à forte valore aghjustatu.

A clientela locale, puru stretta à l'organizzazione spaziale di l'isula, custituisce una parte impurtante di u mercatu interiore, hè per ciò chì aladilà di u travagliu tremende realizatu da l'agricultori, ci vulerà truvà un mecanisimu fiscale, in particolare per via di tasse o detasse à nant'à i prodotti, da garantisce l'accessu di e nostre produzzione à l'inseme di e famiglie isulane.

Urientà l'agricultura ver'di segni di qualità si ferma un asu forte di sviluppu ma ùn si pò caccia fora l'agricultori chì aspettanu certificazione è chì producenu dinù prodotti di valore.

Hè ghjust'à puntu à stu titulu ch'ellu ci vulerà à truvà u costu ghjustu da permette à e famiglie mudeste isulane d'avè accessu à una gamma di prodotti di qualità.

III.4. U CUMMERCIALIZÀ

A cummercialisazione di i prodotti agriculi face parte di l'arnesi fondamentali chì permetteranu à a nostra agricoltura di cunquistà parte nove di mercatu. I prublemi scontri sò à spessu i stessi, vale à dì a mancanza d'iniziativa cullettiva chì pate una moltiplicazione di strutture individuale.

A soluzione passa di modu necessariu per a creazione d'interprofessione chì elle solu averanu a leghjimità per difende l'interessi di e filere. A necessità di fà ne una sola è unica struttura hè un mezu di dà una forza è una leghjimità à a filera.

Stu modu d'organizzazione hà a qualità di a chjarezza in giru à 4 parametri :

- ✧ **prezzu,**
- ✧ **quantità,**
- ✧ **qualità,**
- ✧ **periodu.**

U nostru ingiru vicinu ci deve avvià ver'di una prima reta partenariale cu l'arcu latinu... a Spagna, l'Italia, a Grecia, Cipria, Malta, u Magrebbu sò tanti mercati pussibile.

A moltiplicazione di fiere è d'evenimenti prumuziunali hè necessaria per valorizà a nostra produzzione è per quessa l'Europa di modu naturale ci pò aiutà. S'entre quì in a via di l'elaburazione di a nova PAC chì preferisce a qualità à a quantità via un schema reghjunale mudellu di pricoghji poliattivi à forte valore aghjustatu, integrandu e sfide di l'ingiru è di u sviluppu à long'andà.

A Corsica, puru sendu un'isula di cuntrasti, permette per via di a so organizzazione spaziale ch'ellu si possi benefizià di circuiti corti di cummercialisazione. Chì a clientela possi benefizià di prodotti labelizati, signalati hè una prova di securità è d'igiene alimentare per u cunsumadore.

L'accesso a a catena di produzione si ferma un argumentu di fidanza fundamentale. I circuiti corti di commercialisazione è di distribuzione permettenu d'avè una capiscitura migliore di a catena alimentare da garantisce in fattu a visibilità di a produzione. Stu tipu di circuiti permette dinù a diminuzione di a quantità d'intermediari da regulà a rilazione Cunsumadori/Produttori.

Accurtà i circuiti di distribuzione è di commercialisazione deverà esse una di e priorità d'avvene, nimu pò oghje caccia à i nostri prodotti, a so qualità, a so autenticità è permette di punta una clientela in cerca di scambiu di modu di vita, d'abitudine alimentari ùn ferà chè garantisce è certificà e nostre produzione nun fussi chè in u traccia è in a rilazione di vicinanza trà u cunsumadore è u produttore.

III.5. I SALARIATI AGRICOLI

S'ellu ci hè una professione è una curpurazione à cunsiderà hè quella di u salariatu agriculu. L'agricultura ùn hè micca un settore d'attività cum'è l'altri, hà una specificità particolare. Puru integratu à u settore primariu, deve benefizià di un trattamentu suciale adattu, in quant'à l'impiegà, u statutu. L'agricultori, per via di a so attività deverianu pudè benefizià di soluzione innuvante, sò à spessu intraprese unipersunale in cerca di un statutu da truvà, esse aiutati da un salariatu chì guadagna bè a so vita sendu scaricati durante un certu tempu da perenizà u pricoghju è viabilizà l'impiegu, eccu un assu forte di u sviluppu agricosuciale ch'ellu cunvene di principià. U salariatu face parte di a vita di u pricoghju, hè un elementu forte di u so travagliu, a so paga deverà esse adatta à u so investisce, pruvemuci la di pudè dà à l'intraprese di a Corsica i mezi d'impiegà, sopr'à locu, persone chì facenu campà u nostru rurale è chì averanu una rendita creatrice di ricchezza è di dinamisimu economicu.

À nant'à a Corsica, omu custatta chì à nant'à 4.114 patti di travagliu, 400 anu un durà di menu di 30 ghjorni è 652 patti anu un durà cumpresu trà 30 è 80 ghjorni. Si pò nutà dinù chì 1220 patti anu un durà superiore à 80, 200 ghjorni è chì 1870 patti si sbucinanu à nant'à periodi superiori à 200 ghjorni. Tuttu què ci palesa quantunque una certa precarità di u salariatu chì in u limitu o più di 60% ùn travaglia chè una metà di l'annu. E ragiò di sta instabilità in u durà di i patti tene à un mercatu difficiule ma dinù à cariche suciale chì sò cusì pisie per l'agricultori ch'elli impieganu solu à nant'à periodi zeppi, rumpendu i patti per i periodi bioti.

A sfida di sta riflessione hè di piazzà l'omu in cor'di u dispusitivu, nisuna forma di travagliu pò esse scantata, hè per ciò chì u salariatu agriculu deve mette in ballu un pattu di salariatu di più soffice, di più impegnante chì permette à l'agricultore d'esse aiutatu da garantisce à tempu à u salariatu, una paga decente, in capacità di mantene a so famiglia. U cuncettu di « Flex- sécurité » (sicurezza

flessibile) ùn hè senza sensu, à stu titulu, ci vulerà prupone un pattu di travagiu adattu à u settore agriculu chì pigli in contu dinù a ruralità. Perchè micca premià certi patti, per un dettu, impegnati in e ZRR o ZD (Zones de Revitalisation Rurale ou Défavorisée), cum'è l'impieghi d'avvene.

Quand'omu fideghja u regime di i salariati agriculi è di i tippi di patti per età, si rende contu chè à nant'à 1414 impiegati annu, 1120 patti sò à durata determinata, ciò chì palesa una vulintà chjara di creà impiegu, puru s'è quistione vere si ponenu in u durà ; si nuterà dinù chì più di 650 di sti patti sò à prò di i giovani trà 20 è 35 anni cù 252 per i giovani trà 20 è 25 anni. Hè da veru una marca di fidanza, ver'di a ghjuventù chì si vole impegnà in l'agricultura è participà à u dinamisimu di i terriorii rurali.

In quant'à i CDI, 294 salariati n'anu benefiziatu annu, puru s'è st'indicatore pare debule per certi, omu ùn si pò chè ralegrà chè più di una centina sò in giru à 20-30 anni.

A riflessione ghjusta serà di pupone, patti di travagiu, da durà, garante di rendite decente, limitendu e carighe suciale, da permette u sviluppu di stu settore di l'attività agricula. I salariati agriculi devenu dinù avè a pussibilità d'accessu à a furmazione permanente.

L'agricultura è u salariatu agriculu devenu benefizià di un trattamentu specificu à st'attività, a mutivazione per un salariatu hè dinù di participà di modu naturale à l'interessamentu di u pricoghju.

L'aiutu publicu accunsentitu à l'agricultori in u quadru d'impieghi deve esse solu centratu ver'di l'impiegu è u so durà, st'aiutu deve esse capitu cum'è un fattore di stabilisazione.

Ci vole dinù accertà chì a paga mediana di un operaghju agriculu hè di 1193€ per un omu è 1293€ per una donna, à nant'à a regione Còrsica. St'indicazione sò vevule per e filere animale è d'alevu. Eppuru, si nota una crescita di ste paghe in e filere vegetale cù una duminante à 1437€ è in particolare in viticultura induve a paga mediana di un operaghju agriculu hè di 1798 à mese.

Per ciò, bisognu à rivalurizà a piazza di u travagiu. A calata di u costu di u travagiu hè sbuccatu à nant'à una catastroffa suciale, l'agricultura deve esse à prò di u sviluppu è dunque di creazione d'impieghi stabile.

L'intervenzione publica necessaria in stu settore deve esse fatta à prò di l'impiegu è di a risposta à i bisogni di e popolazione è dunque d'aiutà à u sviluppu ecunomicu.

Per ciò, deve esse valutata da tutti l'attori ecunomici.

A ricunniscenza di e qualificazione, a migliuranza di e cundizione di travagliu, l'accessu à a furmazione devenu esse prediletti. Per ciò, un dialogu suciale permanente si deve concretizà trà l'urganisazione sindacale è l'urganisazione sindacale di salariati.

IV - L'AIUTI È U FINANZÀ PER L'AGRICOLTURA

Stu studiu ùn pudia piattà sta parte cusì impurtante chì vole sviluppà i mecanisimi di sustegnu è di sviluppu di l'agricoltura isulana.

A nostra analisi di a situazione ci hà permessu di custattà chì u sustegnu à u settore agriculu hè purtatu da varii pertenarii istituziunali cum'è l'Europa, u Statu, a Cullettività Territoriale di Corsica è u so uffiziu, l'ODARC.

IV.1. I SOCI ISTITUZIONALI

a) L'Unione europea.

L'Unione Europea intervene à livellu di l'aiuti di a PAC cù l'aiuti di u primu è secondu pilastru.

L'aiuti di u primu pilastru :

- I Dritti à Pagamentu unicu, dati à l'agricultori, da valorizà certe superficie chì anu un cupertu vevule, precisendu bè chì un DPU hè assuciatu à un ettare.

Omu pò usservà chì in più stu sistema di prime hè statu completamente rivistu, à l'occasione di a riforma di a PAC di u 2006, cù un aiuti spiccati. I DPU custituiscenu un aiutu spiccatu, datu à l'ettare di superficie vevule in vece chì a PMTVA, l'aiutu pecurinu o caprunu sò aiuti accoppiati à a produzione.

- A PMTVA chì hè una prima destinata à cumpensà a calata di u prezzu di a carne buina à nant'à i mercati. Sta PMTVA ùn hè attribuita chè in funzione di u bestiame pussedutu, bestiame cumpostu à partesi di vacche è di manze destinate à l'alevu di vitelli per a produzione di carne.

Esse eleghjevule à a PMTVA hè sottumessu à una banda cumposta di 60% di vacche è di 40% di manze, l'aiutu datu hè di 200€ à a vacca per e 40 prime vacche è 175,85€ à a vacca per l'altre chì seguitanu.

L'aiuti peccurini è capruni chî sò dati per rinforzà l'efficacità economica è tecnica di u settore di produzione pecurine è caprone.

In quant'à l'aiutu pecurinu, bisognu à avè o mancu 50 pecure cù una prima di 21€ à a pecura, cresciuta di 3€ di più in casu d'adesione à una urganisazione prufessionale.

In quant'à l'aiutu caprunu, bisognu à avè una banda cumposta d'o mancu 25 capre per un aiutu di 9€ à a capra, cù 3€ di più, in casu d'adesione à a guida di e Bonne Pratiche d'igiene. St'aiutu hè limitatu à 400 capre eleghjevule.

L'aiuti à u secondu pilastru :

- L'ICHN hè un aiutu datu à l'agricultori chî sfruttanu superficie di fenu situate in l'aghje sfavurizate è chî rispettanu un percentuale di carica definitu à livellu dipartamentale. St'aiutu cuntribuisce à mantene a cummunità rurale, à priservà u spaziu naturale, à cunservà è à prumove modi di sfrutera à long'andà chî tenenu contu, in particolare, d'esigenze ambientale,
- U percentuale di carica hè claculatu cusì : quantità d'animali/superficie di u terrenu agriculu. Si valuteghja u percentuale di carica cumpresu trà 0,15 è 1,09 UGB (Unité de Gros Bétail) à l'ettare.
- E MAE permettenu à l'agricultori di percevisce un aiutu, à cundizione d'aduprà in cor'di u pricoghju, è per 5 anni, tecniche agricole rispettucose di l'ambiente.

b) I servizii di u Statu

I servizii di u Statu piglianu in contu e Direzione Dipartamentale di i Territorii (DDT) per istruzzione di i cartulari agriculi è di l'aiuti chî rilevanu di u primu pilastru di a PAC.

c) L'ODARC.

Uffiziu esciutu da u Cunsigliu esecutivu di a CTC, l'ODARC hè urientatu da a lege di u 22 di ghjennaghju di u 2002 relativa à a Corsica chì dice chì a CTC, in u quadru di u PADDUC, indetta l'urientazione maiò di u sviluppu agriculu rurale è furestieru di l'isula. A messa in opera di st'urientazione pubbliche hè data à l'ODARC.

L'ODARC hè un stabulimentu publicu à caratteru industriale è cummerciale territoriale, piazzatu sott'à a tutela di a CTC. In partenariatu cù i servizii di u Statu è e camare d'Agricoltura, l'ODARC cuntribuisce à a mudernisazione di i pricoghji agriculi, à l'istallazione di i ghjovani, à u sviluppu di e filere di produzione.

Per u periodu 2007-2013, l'ODARC hè certificatu urganisimu da pagà i fondi europei per a tutalità di e misure scritte à u PDRC (Plan de Développement Rural de la Corse).

U PDRC hè un documentu di riferenza chì inquadra e misure destinate à l'agricultura è à u sviluppu di i territorii rurali.

U sustegnu à u mondu rurale intervene per via di u FEADER. Per una presa in contu megliurata di l'interessi di a Corsica, a CTC hà vulsutu difende u so pianu specificu di sviluppu rurale è ottenutu chì l'ODARC sia auturità di gestione è urganisimu da pagà i fondi FAEDER.

U PDRC hè dunque un arnese di sviluppu unicu à prò di l'agricultura è di u mondu rurale isulanu.

I so scopi sò definiti di modu chjaru :

- cumpensà l'andiccappi naturali liati à a geugrafia, à l'invichjera di a popolazione è a furmazione di l'attivi agriculi ;
- limità l'andiccappi strutturali liati à u spaziu furestieru micca custruitu è à u spegnà bancariu ;
- sfruttà u potenziale di valori aghjustati cù un ambu di qualità, di potenzialità turistiche è filere di qualità chì fermanu à cunfurtà.

U PDRC hà dinù vucazione à :

- megliurà a cumpettività di l'agricultura è silvicultura (16,3 M€) ;
- priservà un spaziu agriculu è furestieru diversu è di qualità ;
- mantene un equilibriu trà attività umane è priservazione di ste risolve naturale (50,7 M€) ;
- mantene è priservà l'attrattività economica di i territorii rurali per piazzà le cum'è polu di sviluppu appughjendusi à nant'à a diversità di e risolve, di l'attività è di l'attori (8,9 M€) ;
- mette in opera l'avvicinera LEADER (Liaison Entre Actions de Développement de l'Economie Rurale 3,1 M €).

d) L'OEC (Office de l'Environnement de la Corse).

L'OEC mette in opera un inseme di cumpetenze in u duminiu agriculu à traversu diverse misure di u PDRC. Eccu e principale :

- A misura agroambientale detta « territorializzata » :

U dispositivu di programmazione hè di 1/6 mu tutti l'anni (impostu è realizatu). Sta misura hà sempre u meritu d'avè un bilanciù soddisfacente assai postu chì 100% di quelli chì dumandanu sò stati considerati. In u settore di l'alevu, più di 9000 ettari (à livellu regiunale) sò stati pigliati sottu'à patti cù l'agricultori, ritenendu di modu principale attività per l'intratene. Omu pò acertà dinù pocu cuezzione amministrative per via di u sustegnu tecnicu da a parte di i servizii di l'OEC. Stu sistema d'attribuzione averà quantunque bisognu d'esse chjarificatu, da stabilisce un quadru precisu, parechji professionali u pensanu foscù.

À livellu di u seguitu di i pricoghji, si conta 600 agricultori, in l'inseme di e filere, chì sò integrati in un dispositivu ambientale di messa in valore di e superficie. Sta misura hà in più u vantaghju d'esse realizata è esecutata in tempi di paga raghjunevule.

- A misura 225, intitulata « des paiements sylvo environnementaux » per u settore fundiariu

A so esistenza stessa hè di permette à l'agricultori chì anu pricoghji agriculi in furesta d'affissà st'attività.

U so principale andiccappu hè statu rilevatu da e regule communutarie chì limitavanu u finanziamentu à 200€ à l'ettari.

Sta misura palesa di modu chajru mancanze, fattu incalcatu da a non intervensione di u Ministeriu di l'agricultura à livellu di a procedura: dunque, nisuna realizazione fatta è annullazione di sta prugrammazione.

- A Misura 226, intitulata « Défense des Forêts Contre les Incendies »

À l'iniziu sta competenza era gestita da a DRAFF in quant'à a prugrammazione è di creditu, dopu hè stata trasferita à l'ODARC à nant'à a precedente prugrammazione. Dopu, a competenza DFCI di a CTC hè stata trasferita à l'OEC. Sta misura ùn hà avutu chè pocu effettu à nant'à l'agricultura.

A misura 226 A finanza a ricostituzione dopu incendi, ma pocu prughjetti sò stati messi in opera. A misura 226 B hà permessu di cofinanzà a compra di veiculi di prevenzione incendi per l'ONF, i spinghji fochi furestieri è i Servizi Dipartamentali d'Incendiu è di Succorsu.

A messa in opera di una pulitica di difesa di e fureste è di u spaziu naturale contr'à l'incendi, ripresentata da u pianu di prutezzione di e fureste è di u spaziu naturale contr'à l'incendi di Corsica, offre in vece una mansa d'aiuti tecnici è finanziari à l'agricultura è à u pasturalisimu chì hè chjaru chì st'attività cuntribuiscenu à a qualità di sta pulitica publica. Ma ci hè assai à fà.

Oghje, l'incendiu pastorale, sempre impurtante assai dece anni fà à nant'à settori determinati bè hà sminuitu di modu forte.

Un travagliu impurtante hè statu fattu trà alevatori è diversi urganisimi cum'è l'OEC per una animazione tecnica, i spinghji fochi furestieri per intervensione mecanizate in leia cù a creazione d'azzione di DFCI, i spinghji fochi furestieri d'agricultura/DDTM per a messa in opera tecnica è amministrativa di u focu direttu.

Fondi FEDER sott'à autorità di gestione « Statu », destinati à a creazione d'azzione di DFCI da e cullettività è previsti in i studii di pianificazione, anu permessu u fianzamentu publicu di certi travagli à caratteru agriculu (catari, serrende, messe in valore) in seguitu d'azzione DFCI smachjati.

Ma in u quadru di misure agroambientale dette « territoriale » nisuna azzione in cuntribuzione à a DFCI ùn hà pussuta esse messa in opera durante i 6 anni di u PDRC.

Un travagliu cullettivu trà urganisimi agriculi è servizii cumpetente in quant'à a DFCI deve permette di sbuccà à nant'à u sviluppu d'azzione intrecciendu u rinforzu di l'uperaziunalità di l'azzione DFCI (intratene, allargà) è l'interessu di l'alevatori agriculi (pattu per intratene).

In quant' à a DFCI, pulitica publica rilevandu di u pilutame di u Statu, una riflessione necessaria è cummunu trà servizi di lotta, furestieri è ripresentanti di u mondu agriculu deve permette l'elaborazione di misure future rispettendu l'interessi d'ognunu.

Ùn si puderà micca francà di sicuru l'elaborazione di patti pluriannulai trà l'agricultori è i silvicultori in quant' à a gestione di u spaziu.

e) E camare d'agricultura dipartamentale è a camara d'agricultura reghjunale.

E camare d'agricultura ripresentanu l'intermediariu trà u mondu di a produzione, l'agricultori chì ne sò esciute è « l'autorità » territoriale, naziunale è europea.

L'Europa gestisce e prublematiche di sopra produzione è a Corsica hè in sottu produzione dapertuttu. Ci hè un uppusizione forte assai trà a manera chì a CTC mette in opera unepoche di misure (istallazione di i ghjovani, investimentu, produzione) è a manera chì l'Unione europea prevede a messa in opera di certe cum'è l'ICHN.

L'ogettu, à stu ghjornu, di u nostru travagliu hè di ghjuvà di mutore è di cunsiglià per l'urientazione nova, pulitiche cuerente di più chì tenenu contu di i territorii nostri chì appianu definizione sparte u più pussibile da adattà le à e specificità isulane in particolare à nant' à a ricunniscenza di i campi è i percorsi.

IV.2. L'AIUTI À PRÒ DI U MONDU AGRICULU

Cum'è dettu in u paragrafu precedente, parechji aiuti sò stati dati à prò di u mondu agriculu.

a) E prime secondu a produzione à ogni agricoltore hè u sustegnu di basa per un contu di 38 M.

L'aiuti di u primu pilastru (23M€) spartuti sott' à a forma di crediti europei gestiti da u Statu è pagati da un urganisimu chì paga, l'ASP. Sò aiuti di drittu cummunu è i cartulari sò struiti da e DDT.

Sti fondi sò versamenti forfettari DPU (Droits à Paiement Unique) in u limitu di 13 M€ spartuti à nant' à 100 000 ettari à prò di l'elevatori è coltivatori di biada, sia cercu 120 à 130 € à l'ettari u DPU. I viticultori è l'arburicultori ùn sò micca beneficiarii.

Di pettu à l'altri dipartimenti, a Corsica si situeghja in i dipartimenti i più bassi. Omu cunsidereghja u valore di u DPU à 225€ à l'ettari in Francia cuntinentale.

Trà u 2009 è u 2011, 7M€ di più sò stati dati.

Una seconda parte di l'aiuti à 1mu pilastru hè accoppiata à a produzione per un muntante à 10 M€. Cuncerna u pecurinu, u caprunu è a PMTVA per u vacinu.

L'aiuti di u secondu pilastru (15 M€) in quant'à elli riponenu à nant'à un finanziamentu Europa (FEDER), crediti di u Statu, crediti CTC.

St'aiuti sò sott'à l'auturità di gestione di u PDRC di a CTC via l'ODARC urganisimu chì paga.

Piglianu in contu l'ICHN⁶ per un muntante di 13 M€ è misure agroambientale di 2 M€ à l'annu. E prime à u prughjettu di l'agricultori sò concentrate in l'aiuti chì rilevanu di u secondu pilastru è si scrivenu in u quadru di u PDRC.

b) E prime secondu u prughjettu di l'agricultori, st'aiuti rilevanu di u secondu pilastru è si scrivenu in u quadru di u PDRC.

I ghjovani agricoltori à tempu à a so istallazione toccanu 40 000€ è l'aiuti esistenti sò maiurati per sustene l'istallazione in più d'impresti bunificati.

L'aiuti sò destinati à ogni agricoltore scrittu in una dimarchja di mudernisazione, d'apertura di mercatu è di migliuranza fundiaria.

E misure chì si scrivenu in u quadru di u PDRC cuncernanu l'istallazione di giovani, a produzione è l'investisce.

St'aiuti sò liati à una necessità è à una vuluntà di produce di più è di migliurà a qualità. Eppure, sò in relativa cuntradizione cù a pulitica europea è l'aiuti gestiti di modu direttu da l'Europa via u Statu.

c) L'aiuti à e filere.

In u 2011, u Statu hà insuchjatu più di 5 M€, l'ODARC à nant'à fondi euopeani 2,5 M€, sia 24 M€ à nant'à 3 anni. Sò aiuti à e filere in u quadru di una dimarchja di qualità, di u seguitu tecnicu.

⁶ Indemnité Compensatrice aux Handicaps Naturels data à l'alevatori chì anu un costu cresciutu in a produzione di fenu.

Si ritrova quì u filu permanente di u nostru studiu, à sapè chì i nostri partenarii istituzionali sò sempre pronti à finanzia produzione s'è a qualità, l'autenticità è u traccia sò presenti.

Tuttu ciò chì purterà l'agricultore à ottene certificati è labeli, via un accumpagnà tecnicu è un seguitu deverà esse incuragitu. Hè cù a qualità chè no truvaremu un dinamisimu economicu ottimale.

Aldilà stu sistema d'aiuti chì deverebbe permette à l'agricultori d'ottene una rendita ghjusta, palesa parechji limiti in particolare per ciò chì concerna u sistema di a « fattura pagata » chì limiteghja a mubilisazione di l'aiuti à l'investisce. Per pudè benefizià di a suvenzione, l'agricultore deve avanzà a totalità di u muntante è purtà a ghjustifica chì a fattura hè stata pagata.

Or, e difficoltà di tesureria scuntrate da l'agricultori è in particolare i ghjovani agricoltori ùn li permettenu micca d'avanzà a suvenzione è rununcianu tandu à stu sustegnu finanziariu puru necessariu à u sviluppu è à a perennità di a so attività. Sta problematica di a « fattura pagata » deve esse rivista.

Puru s'è stu sistema hè presentatu oghje cum'è un oblicu da permette di ghjustificà e spese pubbliche, facilitazione o simpiificazione sò pussibile. Hè falsu di dì chì l'Unione Europea regisce tuttu, l'Europa ùn definisce micca e regule d'elighibilità, nè mancu a guida di e procedure locale è naziunale. Ci vole à sapè chì tocca què à i Stati è ch'ellu ci hè dunque à livellu locale modu d'ammullì e regule. Ma hè vera ch'è livellu di u Trattatu europeu, hè indettatu chì u minimu pagamentu europeu si deve effettuà di u modu u più prubante pussibile.

Torna sta volta, hè in u quadru di u PDRC è di a prossima programmazione ch'ellu si tratta di mette in piazza un sistema da permette di gestisce l'avanzu di suvenzione è di fà ricullà l'attese di u mondu agriculu à quelli chì decidenu. I sistemi derugatorii sò quant'è mille, ci vulerebbe riflette à cumu ottene un mecanisimu chì si puderebbe sustituisce à a « fattura pagata ».

I pricoghji è e rendite sò assai dependante di i diversi sistemi d'aiuti è dunque indebuliscenu di più a professione. Un sistema d'aiuti lineariu cù criterii d'accessu fissi ci hà permessu di custattà, in particolare e sparità in l'accessu di st'aiuti secondu e speculazione.

Oghje, solu 25% di l'agricultori corsi (fora di i giovani agricoltori) anu benefiziatu di l'aiuti gestiti da l'ODARC. 90% di st'aiuti sò surpati da i settori di a viticultura è arburicoltura.

I quadri fissati da u Ministeriu di l'Agricoltura sò ancu di più fissi è custretti chè quelli cumunutari, ciò chì frena o annullisce e dumande di i purtori di prughjettu.

Omu si trova di pettu à una struttura tecnocratica pisia troppu, fora di e realtà di terrenu. U linguaghju amministrativu hè cumplissu assai per omi di terrenu cum'è l'agricultori. Bisognu à allinà e prucedure, simplificà l'elementi di linguaghju da esse attrattivu per move l'iniziative.

L'accatastera di e strutture si ferma una prublematica forte, palesa una mancanza di chjarezza di u mondu agriculu cum'è un spezzà di e missione è di e respunsabilità. Dunque hè necessariu di simplificà a struttura amministrativa da rende la di più accessibile, l'idea di creà un bancu unicu ùn hè un spruposu soprattutto per migliurà a cuerenza.

In u discorsu ùn si pò oghje prumove una agricultura di pricoghju preghendu la independante è senza prime è dopu mette in piazza a crescita di e prime una volta ghjuntu à e respunsabilità. A sparghjera di e prime hè capita male ma soprattutto diffusa male in particolare in a mancanza d'unità di trasformazione induve si dumanda pocu aiutu à l'investisce.

Omu pò accertà dinù chì sò e speculazione à long'andà chì ricevenu u più d'aiuti.

Eppuru e soluzione esistenu, soprattutto à livellu di u sistema d'aiuti induve hè imperiosu di sustene a compra cullettiva per supranà e difficoltà liate à a « fattura pagata ».

Cusì a carica amministrativa hè purtata da a struttura chì acquista è chì si sustituisce à l'agricultore per fà l'avanzu di a parte suvenziunata. Omu deve in fine ghjunghje à un equilibriu in a spartera di l'aiuti trà filere è à l'internu di e filere.

U migliurà in u pagà di l'aiuti è di u sistema di cauzione finanziarie da a CTC davant'à e banche per l'agricultori hè di primura.

St'isula cù qualità tremende deve permette di sceglie un sistema d'aiuti da sustene u sviluppu di a produttività di i pricoghji da reduce a so dipendenza à l'aiuti è fà chì cusì sia resa perenne a so attività.

Cum'è hè stata detta nanzu, a creazione necessaria di un bancu unicu per accumpagnà l'agricultore in e so dimarchje in u quadru di e dumande d'aiuti publichi hè forse a prima misura da mette in piazza.

V- CHJUSURA

Stu studiu ùn hà manc' à pena cum'è scopu d'avè un sguardu criticu o d'inchjudà tale o tale ma di purtà una riflessione generale per custruisce insieme u mudellu agriculu corsu di l'anni 2010-2030.

Hè un travagliu cuncertatu induve ci vole à salutà l'impegnu di i membri di a cummissione « agricoltura » di u CESC è ringrazià l'inseme di l'intervenanti chì anu datu di u so tempu per schjarì sta dimarchja.

Stu raportu hà cum'è fundamentu di piazzà l'agricultore in cor'di u nostru mudellu di produzione.

L'organizzazione di a nostra riflessione hà cussistutu à studià tutte e tappe di a vita agricula fendu prima un bilanciù, po strada facendu sò nate soluzione per ogni prublematica posta ch'ellu sia per a furmazione, solcu di a vita agricula, l'istallazione, a trasmissione, l'elementi permettendu a dinamica di e filere o u fundiaru è e prublematiche di finanziamentu di u mondu agriculu.

Senza nisuna pretensione, stu raportu si vole una urientazione da purtà soluzione, semplice ma chì volenu simpiificà in u cutidianu a vita di l'agricultori da ch'elli possu svilupparà produzione di qualità, pudè avè accessu à un fundiaru cù un prezzu ghjustu da istallà pricoghji perenne ma soprattuttu avè una curpurazione unita daret' à prughjetti strutturanti. U nostru mudellu agriculu deve esse più ammanitu, più apertu, tutt'ognunu ci deve truvà a so piazza, nimu deve stà si fora.

In fattu, stu studiu hà cum'è scopu chì in l'anni à vene i cunsigli dati in i duminii d'attività di u mondu agriculu sianu seguitati da una vulintà pulitica.

Femu a sfida chì stu travagliu chì hà adunitu l'inseme di l'attori di a vita sucioeconumica isulana ùn sia micca un ennesimu prughjettu ma ch'ellu sia da veru un documentu d'urientazione da purtà soluzione è risultati.

Dunque speremu chì stu documentu ùn sbocchi micca in l'anni à vene à nant' à una agricoltura corsa morta d'ùn esse stata o cacciata fora per ùn avè avutu u curagiu di piglià u so destinu in manu. Tocca à noi, omi è donne di Corsica, di purtà in a nostra diversità una gamma di soluzione.

LISTINU DI E PERSONE ASCOLTE

U Cunsigliu Ecconomicu, Suciale è Culturale di Corsica ringrazia ogni persona intesa chì hà cuntribuitu à l'elaburazione di stu raportu.

Sru **BATTESTINI**,
(CPS di Corti)

Sru **BOURGEAUD** Pierre
Sru **COLOMBANI** Joseph,
(FDSEA Corsica Suprana)

Sru **CONVENTI** Yves,
(Capiserviziu pricoghji –agricultura, furesta, ruralità, ODARC)

Sru **CRISTOFARI** Pasquin,
(Incaricatu di missione – ODARC)

Sra **DOSSOT**,
(Incaricata d'ingegneria di furmazione à a DRAAF)

Sru **FLUIXA** Paul André,
(Presidente di Via Campagnoli)

Sra **GARCIA**,
(CPE liceu agriculu di u Borgu)

Sru **GIOVANNI**,
(Direttore du CFPPA Corsica Suttana è CFA agriculu di Sartè)

Sru **GUENIN**,
(Direttore di a MSA)

Sru **LILAS** Jean-Pierre,
(Direttore di a Direzione Reghjionale di l'Alimentazione, di l'Agricoltura è di a Furesta)

Sru **LECA** Gérard,
(Via Campagnoli)

Sru **LUCIANI** Jean-Louis,
(Presidente di l'ODARC)

Sra **LUCIANI** Maria Fé,
(Ghjovani Agricoltori di a Corsica)

Sru **MALLARONI** Jean Pierre,
(Alevatore di pecura lattaghja in l'Ortolu di Sartè, elettu prufessiunale, Presidente di u collegghju di l'appurtatori)

Sra **MORETTI**,
(CPS di Corti)

Sru **ORSUCCI** Christian,
(Presidente di a SAFER Corsica)

Sra **PASQUALINI**,
(CPS di Corti)

Sra **PIERI** Vanina,
(Presidente di l'ATC)

Sra **PRIEUR** Laure,
(Risponsevule amministrativa ILOCC)

Sru **REVOLIER**,
(Direttore Cascia reghjunale di u Crédit Agricole di Corsica)

Sru **SECONDI** François,
(Direttore di u CFPPA Corsica Suprana è di u CFA agriculu di u Borgu)

Sru **VALLECALLE** Antoine,
(Direttore di a SAFER Corsica)

Sru **VELLUTINI** Pierre,
(Direttore di l'OEC)

Sru **VENTURI** Jean-Marc,
(Presidente di a Camera Reghjunale d'Agricoltura)

LISTINU DI E SIGLE È ABREVIAZIONE UTILIZATI

PIB	Produit Intérieur Brut
PBS	Production Brute Standard
SAU	Surface Agricole Utile
LEGTA	Lycée d'Enseignement Général et Technologique Agricole
CAPA	Certificat d'Aptitude Professionnelle Agricole
CFAA	Centre de Formation d'Apprentis Agricole
CFPPA	Centre de Formation Professionnelle et de Promotion Agricole
CPS	Centre de Promotion Sociale
CATAM	Certificat d'Aptitude aux Techniques Agricultures Montagne
BPREA	Brevet Professionnel Responsable d'Exploitation Agricole
JA	Jeunes Agriculteurs
CTOA	Commission Territoriale d'Orientation Agricole
PDE	Plan de Développement de l'Exploitation
CACES	Certificat d'Aptitude à la Conduite En Sécurité
FIMO	Formation Initiale Minimale Obligatoire
AFPA	Association pour la Formation Professionnelle pour Adulte
MSA	Mutualité Sociale Agricole
CMD	Convention de Mise à Disposition
ILOCC	Interprofession Laitière Ovine Caprine Corse
APRODEC	Association Promotion et Défense de la Clémentine Corse
CCP	Certification Conformité Produit
IGP	Indication Géographique Protégée
PADDUC	Plan d'Aménagement et de Développement Durable de la Corse
ZAP	Zones Agricoles Protégées
POS	Plan d'Occupation des Sols
PLU	Plan Local d'Urbanisme
SAFER	Société d'Aménagement Foncier et d'Etablissement Rural
EPF	Etablissement Public Foncier
AFP	Association Foncière Pastorale
FEDER	Fonds Européen de Développement Régional
FEADER	Fonds Européen Agricole pour le Développement Rural
CIR	Corse Initiative Réseau
DJA	Dotation Jeune Agriculteur

ODARC	Office du Développement Agricole et Rural de la Corse
AOC	Appellation d'Origine Contrôlée
AOP	Appellation d'Origine Protégée
PAC	Politique agricole Commune
DPU	Droits à Paiements Unique
PMTVA	Prime de Maintien de Troupeaux Vaches Allaitantes
ICHN	Indemnité Compensatoire de Handicap Naturel
MAE	Mesures Agro-Environnementales
DDT	Directions Départementales des Territoires
OEC	Office de l'Environnement de la Corse
LEADER	Liaison entre actions de Développement de l'Economie Rurale
DFCI	Défense de la Forêt contre les Incendies
ASP	Agence de Service et de Paiement

**U CESC di Corsica ringrazia ogni persona chì
hà cutribuitu à l'elaburazione di stu raportu.**